

Mukhora Ti Woophunyeya



Koouxuhuru, Munna Neville. Koouxuhuru. Ti yooreerexa otthikela Mpaani mw'Apwiya. Miyo okathi wothene ti wookisivela otthikela otapernakulu, hata wira kinrowa wowi. Yookhala etthu mwaha wa nipuro nla naamukhaani na khalayi enikisiveliha otthikela-vo. Nla paahi ti, oh, miyo...Ela ti yaari ekerej'aka yoopacerya emosa-ene kitonko aka ohoolela. Nto enikhala paahi ntoko yooreera otthikela-tho va. Ni miyo kookupali wira voosis'ule wuulupale okathi nsuwa ninrow'aya okhoootta waarya ni ittheneeri sinrow'aya ovukuwa waarya waya vakhani-vakhani, miyo kookupali wira anookhala atthu amosa amosa a etapernakulu yeela anrowa okhala iwe nihiku nlo, yaawo anrapihiwa Mphomeni wa Mwaapwittipwithi. Miyo kinwehererya okathi yoowo.

² Okathi waarw'aka musaala naanaano va, kookumanana Munna muthiyana Arganbright iwe. Vano owo aakileela wira yaahikhala atthu amosa amosa va yaari omuthukumanoni w'oKingston, yaathotonle okathi yoowo, ni miyo...e... kaahitteeliwa murima okhalana yaawo vaava ntoko onamoona. Vathu ti vatthu vary'aya, yakhala-ru ni matat'aya oovenxiwa, ale yaari omuthukumanoni w'oKingston oJamaica. Pahi, ayo, ottuli iwe sana. Vaareera, ti yooreera.

³ Kinnoona epaphelo postale ya Oral. Miyo kinoona wira nyuwo moolaleya mithukumano sawe. Miyo nkaasuwenle eyo mpakha, mahiku, mpakha nsana. Kinoona wira ompacerya mahiku yeettaka mathanu na mosa, kahi siiso? Okhuma mathanu na mosa mpakha muloko ni mathanu, Munna Roberts oLouisville. Vano, murowe mwamwiiwe. Munna Roberts ti m—mpatthani aka a vatthirima, ni murumeyi eekeekhai a Kristu. Ni miyo kookupali wira nyuwo munoosiveliwa ni mitthaka sawe, ohiyu p'uhiyu. Ni e...yawawe, okathi owo onaavekelel'awe aretta, miyo—miyo kookupali wira nyuwo munoomoona Muluku weetta, okhala wira owo nakhotto muulupale o waamini, Munna Roberts ti, ni mulopwana mmosa Muluku onimurumeel'awe n'uwerya. Ni muteko awe onimunuwa opacerya... .

⁴ Miyo kinnuupuwela okathi omusuwenly'aka Munna Roberts opacerya wene, owo aari muheemani yaamukhaani yoothaalasa wu oSt. Louis, Missouri, ni miyo kaari...nnari, oKansas City, Missouri. Ni miyo kaari oKansas City, Kansas, mw'autitoorio. Owo aakilanthi ekhukulu y'ohoolo. Omanly'aya muteko, hiyo nirukunuwa nirowa ottuli nnavaanela. Atthu khukisuweliha owo. Owo ti mmiravo okivikana miyo; Oral ori wopaceryani wa miyakha sawe miloko mixexe. Nto vano owo khwira, "Nyuwu munuupuwela wira Muluku onimwiiwa mavekelo aka a aretta?"

Miyo khwira, “Munna, Owo onimwiiwa mavekelo a khula mutthu onvekela.” Vano, owo khupacerya, nto owo khwira, “Miyo kinrowa va!”

⁵ Nto owo mutthu oosuwela sana, ni osoma wa koleexio, miyakha mixexe sa pisikoloxia, ni miyo kookupali wira owo mu—mutthu oottittimiheya. Vano owo oophiyerya nipuro vano vaavo owo orin’awe nikhuru n’anamiruku vakhiviru ni yoowo, n’itthu, mpakha, owo aalavulaka, owo—owo onootthokelela oratta-ene. Ni nyuwo vekeekhai munoosiveliwa ni yoowo, kookupali.

⁶ Nto tivo vano miyo kaatthuna kihimye vakhani paahi wa etthu Apwiy’ahu yiiraly’aya vamuthukumanoni vahu mwaamukhaani wo wiiveviha oJamaica ni oPorto Rico. Yaari etthu yootikiniha wira miyo kaahirowa wu, okhala wira atelefoni anci-ene annilikari. Ntoko Leo va sinsuwel’awe, wira telefoni. . . Ni moovirani wa esumana, aakhala vekeekhai mapuro imiya sene aniihana wira sikhale mithukumano. Masi nnya miyo okisivela woona wira kinimweettiheriwa otthu onrowaaka, okisivela eyo. Vakhala wira kinoorowa okhala wira mutthu t’orumme wira kiihaniwe kirwe, vano kaamoorwa mwa nsina na ekerej’eyo wala mutthenkeso owo. Vakhala wira kaamurowa mwaha wo wira Munna Neville t’ohimme wira kihaana orowa, kaahaana orowa mwa nsina na Munna Neville. Masi miyo onkisivela orowa Yesu akiruma vale, nto munoowerya orowa mwa Nsina n’Apwiya Yesu, wira mwakumane n’atthu.

⁷ Nto miyo kaahimmaathi vooilini, ni miyo kaarookhulumuwa vakhani. Ekhatu ela, voohilekelexa wala voolekelexa, miyo kihaana ohiya ekhatu ela, okhala wira enoohonona mmilo aka paahi vamphiyery’aka ohaleleka ohiwerya ovilela ela. Miyo kinoowerya okhala ottaiwene n’utthika. . . Hiyo naahirwa nihiku nlo, Leo ni miyo, muhina mwa imilya miloko mixexe [64,3 km], vaamanly’ahu okhala mmattaaranani oFlorida, mmilo waahikukuttheya voomalela, nave muhina mwa imilya miloko mixexe sa oLouisville khuttiyeya-tho. Munna Banks Wood ohaana okhala va nipuro nno voosiis’ula. Nto nihiku nlo kirwaaka okhuma oKingston ni—ni oPorto Rico, weiwo mmilo aka waakhanly’aya woolikana paahi; nto miyo kikhuma mmuttekeni, nlelo vooreera wene; nto nihinatthi ophiya oJeffersonville, khuttiyeya-tho. Moone, eyo ekhatu ela va. Owo mwaaxiitthu musulu, wala Muluku, mmosa, otthunaka okisusiha. Tivo, miyo—miyo nkinsuwela sana ela. Miyo kinnilompaka n’uvekela imara sinci-ene.

⁸ Masi, mwa khula enamuna, miyo kaammalaru ovenya, yaari iwora soophiyaka tthaaru sa voosiisu. Nto amwaar’aka ni mwanamwane mwammiravo yaamurupasa. Nto miyo kivenya mpararini m’olili, khuwoona atthu anci-ene yaathukumanne nipuro nimosa nuulupale, nto miyo kimuhimeerya Billy

Paul, “Nyuwo nvolowe mme mwaavahe atthu ale ittikitti sa mavekelo.”

⁹ Vano owo khwira, “Ayo, paapa.” Minutu vakhani owo khutthika, khwira, “Khanvaheya ittikitti sa mavekelo atthu ale.” Owo khwira, “Nyuwo munnimoona mulopwan’ola eemenle va?”

Miyo khwira, “Ayo.”

¹⁰ Owo khwira, “Ole aari va, nto miyo khwira, ‘Othene ale antthuna ettikitti ya mavekelo, mukhale ni matata osulu.’” Ni khwira, “Miyo kirowa onvaha ettikitti ya mavekelo, owo khurowa nipuro nikina. Vano nto miyo kirowa vaavo, vano owo aari nipuro nikina. Vano owo ori va osusenryeene nno.” Khwira, “Nkinvaha hata ettikitti emosa tu ya mavekelo.”

¹¹ Miyo khwira, “Ahe, Billy, khamurina y’ovaha ittikitti sa mavekelo, okhala wira wookhala opuro muulupale va mpakha atthu vanwery’aya . . .” Ittikitti sa mavekelo siri wira seemexeke evitikavitika . . . moone, ni waakhaliha oothataana. Miyo khwira, “Oh, miyo kinoowerya waakuxa atthu othene vale, oohaattexa ovikana opuro orin’aka, ni waathataaniha ni waavekelela mmosa mmosa.”

¹² Vano owo khwira, “Vaareera.” Vano owo khirukunuwela moonoo woolopwana khukisusa. Ni miyo khirukunuwela epantte *ela* nno okathi owo aarowaawe epantte *ele* iwe, ni miyo kimuwehaka.

¹³ Vano miyo khwiiwa Nsu naakhuma Wirimu, khwira, “Masi okathi ula Miyo kinoopacerya owinnuwihani.” Vano miyo kiweha, kiira kihinatoko wona muttitthi ene yoowo w’atthu, awo yaamuthukumana ekhumaka mapuro othene.

¹⁴ Nto nsina na Munna Roberts khurumoliwa, khwiiriwa, “Vano Munna Oral Roberts onimoorwa wira owooneni.”

Nto miyo khwira, “Kinrowa omukhomasa sai Munna Roberts?”

Khwiiriwa, “Enamuna emosaru owo onrow’awe wookhomasani nyuwo.”

¹⁵ Vano, miyo khumoono Munna Roberts arwaaka owanreene efaatu yooriipa, ni ekofiyo yaamukhaani ntoko Bing Crosby sinwar’awe, ele yaamukhaani onrukunxel’awe osulu khipurulela vathi, ekofiyo yaamukhaani yooriipa. Nto miyo keemenle osulu p’uhimya wene, nto owo khuweha osulu khwira, “Sai, Munna Branham.”

Ni miyo khwira, “Sai, Munna Roberts,” khunvaha mukhono.

Khwira, “Nyuwo murina muttitthi wooreera.”

¹⁶ Miyo khwira, “Vekeekhai muttitthi, Munna Roberts.” Nto owo khirukunuwa khurowa epantte Billy aaronw’awe, moonoo woolopwana.

¹⁷ Nto miyo khuupuwela, “Kinrowa waalavulana opacerya vai?” Ni miyo kaatthuna mwa mapuro othene ophwanya vatthu wira kilavule. Miyo kaaphwanyaneya mukhalelo mmosa, etthu yonyoholiwa, vahaawery’aka woona vatthu wo—woopacerya waalavulana.

Nto mutthu mmosa khwira, “Ahe, murwe nno.”

¹⁸ Miyo khwira, “Ahe, nyuwo khamwaawerya woona sana iwe.” Nto miyo khupacerya ovira nipuro nle. Vano miyo kaahuupuwela ela nto, miyo khwira, “Etthu yuulupalexa ya miyo wira okhala owiyevehiha mmurimani mwaka, okathi wothene, ohoolo wa Muluku ni ana Awe.”

¹⁹ Vano kikhuma mwa yoowoona eyo. Nto miyo khuupuwela, “Etthu ile enihimyani? Khino enihimya wira nnoorowa okhalana etthu... Wala enrowa okhala—enrowa okhala vai?” Nyuwo moone, imara sikina, mwa soowoona, Owo khonoohimeeryani vekeekhai vatthu, Owo—Owo onoolavula paahi nto nyuwo paahi... Eyo enikhala ntoko, nlikanyiho. Ni miyo kookupali wira nyuwo munimusoma Bibilia munniiwa sana eyo.

²⁰ Vano nto miyo kaahirowa ekatthi y’ohoolo khukilaathi okathi vakhani, nto yaari ewora ya neeraru ni miloko miraru wala ewora ya neexexe voosiisu. Sikivola ikhove sana. Miyo khutthika khimmaathi, vano ekhala etthu kaalonhe aka, ni yaari yooloha yootepa otikiniha. Ni anci-ene a nyuwo othene munnimusuwela mmosa a matimministratore, Jack Moore. Munna Jack Moore, miyo kinnimusuwela miyakha sinci-ene. Miyo kuupuwela wira kaarookhuma ni khuvarihana okumana ni mwan’awe muthiyana, mwali oophiyaka miyakha muloko ni mithanu na miili, ni kaaroomuvarela ntata, kimuroihaka vasulu va mwaako, Jackie mwaamukhaani. Ahe, miyo kinnimusuwela okhuma okathi waary’awe mwaana a vanipeleni. Nto miyo kaamuroiha vasulu va mwaako, vano miyo kaaheetta ikwarterawu tthaaru sa mmuttettheni kirowaka vasulu va mwaako, kimuroihaka mwali ula. Nto hiyo khurwa vathi va mwiri muulupale, vano owo khukilaathi. Nto ntoko axiruusi anci-ene oolelo aniwara isaaya iye si, nyuwo moosuwela, sookhala ntoko sookhuneleya ota, nto owo aawanre esaaya ntoko seiyo. Vano owo khikuxa esaaya yeela yaamukhaani p’uhimya wene khwaatalela khukilaathi. Nto ntoko a mw’avano volimaleleya awehanaka mmosa ni mukhw’awe, owo khikhuraaniha miyoono sawe so khupacerya oweha osulu. Ahe, Jackie mwali mwaamukhaani ooreera murima sana, masi owo orina eyaano yuulupale sana ni maitho maalupale sana, ni maihi ooxeerya sana, oohikuxa murima sana, masi muhano mwaamukhaani ekeekhai. Nto miyo kaaniwerya woona maitho awe owo awehaka osulu, ni moota osulu wooneel’aya mmaithoni mwawe.

21 Ahe, miyo kaahisusa voophiyaka inawu thanu [1,52 m] vaary'awe-vo, miyo khimmaathi epantte ekina ntoko so, nto miyo kikuxa malaxi khuhela mwaano mwaka, nto khupacerya onyamunya malaxi yaala. Nto miyo khupacerya wuupuwela, "Kiniira exeni osulu nno? Vano, miyo mulopwana mutokweene, nto ni mwali ula. Vano," miyo khwira, "Miyo koothela ni kookhalana nloko n'anamwane. Miyo nkirina hata mwaha osulu nno ni mwali ula."

22 Nto miyo khupacerya ovenya. Nto, okathi ovennyaaka, Nsu nimosa naahikhuma mmwirini, khwira, "Eyo ti ya ekhanyeryo ni niwoko."

23 Vano miyo khivenya, ni kaahala okhuwela, e—ettoora. Miyo khuupuwela, "Oh, kiireke enihimya wira kinrowa ohiya waamini wala yookhala etthu enrowa okikhumelela?" Ahe, miyo khuupuwela, "Keererya ottharihela muupuwelo aka, nto sinookhala sothene iya sookitikiniha, tivo miyo kinoomuwehererya Muluku paahi." Vano miyo khupacerya olompa. Miyo khwira, "Pwiya, yooloha ele ti ya yoowoona ele yiiraneiyeye ohiyu opaceryakaru, wala enihimya exeni?"

24 Numala owehererya okathi vakhani, khino ewora emosa (Amwaar'aka yaahivenya ni yaahilikanyiha yolya ya voosiisu.), nto Nsu nno khurwa-tho, khwira, "Murowe oKingston, nto munooleliwa weiwo etthu yo wira."

25 Tivo, naanaanoru miyo khurowa oKingston. Vano awo—awo yaahisuwela Namaxexe oxekuwa wira miyo kaarowa okhala weiwe Namathanu. Owo ti mulattulo wothene hiyo naarin'ahu. Miyo nkihiyo oosuwelexa wira . . . ? . . . wala waalikela mittitthi, okhala wira voolimaleleya miyo kinootepiha seiyo. Masi ohiyu woopacerya, kaamwiira wira naarina atthu oophiyaka ekonto, oh, oophiyaka ekonto emosa ni imiya piili, vano, okhala wira eyo yaasuwelehiwe nihiku nimosa paahi. Nto mmeeloni mwaya khupacerya anamihupi etthyawaka imilya xexe [6'5 Km], evahereryanaka, ewelaka miyaako. Namuhupi mmosa aamutthyawa iwora soophiyaka xexe, vano n'umuhiya namuhupi mukina owela vamwaako. Nto ohiyu wa nenli yaahikhala oophiyaka ikonto thanu. Nto ohiyu wa neeraru yaahaalikeliswa oophiyaka ikonto muloko ni thanu, khino miloko miili. Ni yaahikhala ikonto ikonto sene yaaruule w'Apwiya.

26 Nto yoowoona yaari, ekereja yaamukhaani, mwali uwo aari harusi, mwanamwane paahi, nto eyo yaahimya oharusi wa ekereja. Ni ikwerterawu tthaaruu sa mmuttettheni saawela mwaako, yaari mahiku mararu kaarowaaka olaleerya. Ni okuxa ekereja yaamukhaani eharusi ni muteko aka, okhuma vatthu vaary'aya-vo, mpakha musulu mwa itthu sa Muluku, mpakha eyo otitikinya esisiro yothene.

27 Nto, oh, arumeyi n'atthu yaaphwanyaneyaya vaavo, yinlaka ni avekaka ni ekhanyereryaka, "Ohiyu umosa paahi wala mili," makhulupale a mmuttettheni.

28 Hiyo naahikhuma iwe mpakha oPorto Rico. Iwe hiyo naakheliwe n'utthapa wuulupale, ni atthu ikonto ikonto sene yaanisareya mupistani, mpakha saaheliliw'aya wira minepa soorikexa s'atthu ikonto miloko mixexe saahirwa w'Apwiya Yesu. Nto mwa eyeettelo, miyo kinwehererya wira miyo... miyo kaamuhimeerya ela ekereja aka, masi miyo nkaawerya ohimya ota vaatthuni, vatthu vahikhanle atthu oowaani, okhala wira khino ela yaamuwehiwa okhala yoovonyeya. Masi miyo kookhalana nsina na mphuki va vapapheloni, aalavunle okathi hiyo waakhum'ahu, vaava va, owo ni muloko awe.

29 Nto miyo...Owo—owo iirale, "Hiyo ninnikhala oottittimihiwa vasisironi okhalana arumeyi oohiyana-hiyana." Owo khwira, "Okathi Mwenye Billy Graham omanly'awe ohiya esisiro naanaano," nto khwira, "hiyo nahikhhalana mu—muthukumano woovuwa," owo khwira, "masi Billy Graham aaniruuhenle paahi Ehapari emosaru hiyo nniwak'ahu okathi wothene." Owo khwira, "Vano hiyo naahittittimiheya okhalana Mwenye Roberts vasisironi," khwira, "nto Mwenye Roberts oonivaha muthukumano muulupale wa mahiku mararu. Masi," khwira, "soothuma saari soowaatta woteli," khwira, "khuhiya itoolare ikonto miloko miraru mwaha wa ohiyu miraru, wa soothuma sa woteli." Owo khwira, "Vano Mwenye Osborn aari weno, yoowo aari murumeyi muulupale a Kristu. Masi," khwira, "okathi Mwenye Osborn oronw'awe, waahikhala othepiwa," khwira, "yaakhala ntoko itthu sothene saahimala."

30 "Masi," khwira, "hiyo nooweha wira muthukumano ola yaari yoorika okhala mutthu vaplataforma wira Munna Branham amuvekelele. Masi," khwira, "vamanly'aya miteko ophiya okhomoni, hiyo noottottela ikhatera sa khalayi ni attootto ni itthu sothene ikamiyawu sene, vamuthukumanoni." Owo khwira, "Ekwah'ela khaari mutthu, Muluku t'orwiye wa hiyo," owo khwira.

31 Miyo khwira, "Muhiwehererye mavekelo aka; masi mavekelo anyu iwo, mwixatheryane matata mmosa ni mukhw'awe." Nto awo yaanaaruha etuusiya ntero wala piili vaplataforma, ni, okathi othokorerya okhurunw'aya, atthu yaanikhuwela paahi. Hiyo naari mooteeli w'ekalaase ya neexexe, ni naahiliva soothuma sahu sothene ni olya wahu, yoohi.

32 Nyuwo mookhaliherya wira yeeyo, nyuwano, ni sanamuloko sanyu munikiveelih'anyu. Eyo ti yiirale ela. Ni miyo kintthuna nyuwo musuwele wira, mwa sothene iyo, nyuwo mookhalana epantte wa yeeyo. Ni nihiku nuulupale ni noovuwa ninrwa, Muluku onimoothuvelani eyo. Moone, nyuwo khimwaarina . . .

³³ Mutthu arowa mmansawe n'upaka etthu, nto, nyuwo moone, okathi mutthu uwo onrow'awe, awo animuupuwela, "Othepiwa wuulupale, Muluku oonihiya." Muluku khonoohiyani. Owo ori ni nyuwo okathi wothene. Moone, ti nyuwo paahi munikhalexa muhina mwaya ntoko khula, ntoko mutthu ti mutthu. Muluku pooti omurumeela mutthu mwa muteko mmosa, masi eyo khenihimya wira mutthu uwo ookhalana muthanlelo wa Muluku. Onkhala omwaamini wanyu Muluku yeenyu.

³⁴ Nto awo yaanirowa vale n'ikaaro saamukhaani sa khalayi, yaakux'aya ntoko iroota sa ikaaro s'anamwane, ni—ni opaka ethaapwa, ni waapweha atthu vaavo ni waapurulela mpaani. Nto numala muteko ophiya okhomoni, epista yothene vaatthyaiwavo yaakhala siyo, awo yaamurowa n'ikarosa n'uthukumanya ikarinyo sa khalayi ni ikhatera suulupale sa khalayi, ni attootto ni marepa ni moolili, ni vatthu awo akhummy'aya paahi ni waahiya, okhala wira Mukhalelo w'Apwiya waari vaavale. Ti yeeyo hiyo entthun'ahu wona. Mutthu ori ota wa yookhumelel'eyo nto, Muluku t'oneetta.

³⁵ Kitthikaka, wira kikhaliherye paahi voosiis'ula, kinrowa olavula minuva vakhani. Ni miyo kihaavekela amiravo wira ehikumiherye efiita. Mahiku mararu miyo kiheererya voviilipiha wuupuwela wira, "Kinrowa olavula exeni?" Ni voosiis'ula, kihinatthi okhuma, kaahoono olopoliwa woolipa mmurimani mwaka wira kihimeerye ekereja. Nto miyo khwaaleela wira, "Mukaravari efiita, masi muhikumiherye wira situmihiwe."

³⁶ Masi nihinatthi wira ela, miyo kaatthuna kooleleni paahi onamoona mwaamukhaani, alakela onoowiirihani sana. Owo waahikiiriha sana. Hiyo naahirowa mukwaha wo omiserya wa mahiku mararu, Leo ni Gene ni miyo, ni mwan'aka Billy Paul n'amwaar'awe, mpakha wa mpatthani mmosa onoorwa wa mutapernakulu, onikhuma muhina oGeorgia. Nto yaaronnikuxa mpakha ottaiwene vantthaarani, miyo nkinsuwela waari wovi vano, waattamela Okeechobee wala etthu ntoko yeeyo, miyo nkinsuwela nsina aHinti ale maSeminola avahaly'aya. Masi, mwa khula enamuna, hiyo naari imilya sinci-ene ottaiwene.

³⁷ Nto Munna Evans ula, munn'awe natampii. Ni owo mulipa-oomiserya muulupale, vano owo aahirowa ottaiwene mmattaarani miyeri vakhani sivinre. Ni awo aakhalana ele aniihan'aya "evilithanu." Nto evilithanu yaaroomuluma, ni owo oroocaaliwa okhala mukumi. Mwetto awe khwiipa, vano khikuxiwa mpakha wa matothoro nto awo khimuhoma ixasawu. Itthu iye sinniiva. Ni awo aakhalana ihusi sa mmaasini mpuwa mme nave, ihusi sa mmaasini, ihusi, ikonya siniphiya inawu miloko miili [6 m] orakama waya.

³⁸ Nto okathi hiyo waamisery'ahu ottaiwene iwe, kaahivara nikhupa nuulupale. Oh, naari nihiku neekeekhai n'o—n'orekesa.

Ni nlo naari nuulupale kahaawery' aka okumiha mmaasini, vano nlo naahimookola sana nancoolo khurowa, wala khwiipurula mmansaya. Nto hiyo naahikhalana makhupa manci-ene, oophiyaka ilivura miloko mithanu [68 kg] sa makhupa maalupale. Ni iyo, ikina saya silemelaka ilivura sinci-ene, ni okhuma ilivura xexe mpakha thanu na piili, thanu na tthaaru. Nto miyo kaahivara nla nuulupale, vano nlo khutthyawa.

³⁹ Nto miyo khurihela kitthikihaka, vano miyo—miyo kivara nikina, noophiyaka ilivura thanu na mosa, thanu na piili. Ni miyo kaarina ekopo yoorakama yaatthuneya ophiteeriha makukhu a khokowa. Nto Munna Evans aarina... Hiyo othene naari onaana mwaha wo weeta mmaasini, okhala wira ale matthiya paahi. Nto owo aahirula ixapattho sawe khikhuna metto sa ekaalsa awe, ni aakilanthi nipuro nimosa naamuukhaani nowuuma, kiireke uumihaka ikuwo sawe. Vano owo khoona ehopa ela yuulupale yiiwolowaka waattamela mmirini, ni miyo keetta mmaasini kimwaattamelaka yoowo. Owo khwira, "Nwehererye vakhani, Munna Branham, miyo kinimoovarelandi." Nto owo khikhuma atthyawaka vale. Ni miyo kaahipurulela osulu, kinoona wira ehopa yaahalela okhwa, erupaathaleene mmakukhuni. Nto owo khikhuma atthyawaka wira avare. Nto, vairaly'awe siiso, owo khikhuwela, vano va owo khinarwa atthikaka. Evolithanu yaaroomuluma.

⁴⁰ Vano hiyo khuwehaweha eyo, saahikhala miithe sa maino vannawoni wawe vaavo evolithanu yaamulumm'aya-vo, ni yaaninwerya vanci-ene mpakha maithori okhala mmaithoni mwawe. Khwira, oona ntoko wira makhuva awe yaamurakala paahi. Nto iwe hiyo naari, imilya sinci-ene ottaiwene vanttaarani. Owo mutthu muulupale ookhalaka ooyaariwa. Nto enowa yoolumani, nyuwo munoowereiwa vanci-ene muhina mwa minutu vakhani mpakha nyuwo ohalela okhwa. Ni Leo eemenle vaavo. Vano yookhala etthu yaakirwenle mmuruni mwaka, "Nyuwo nlelo mwa Muluku!" Nto okathi owo aavarel'awe nnawo nawe ni atthitteeryaka, ni miithe iye miili suulupale sa maino vale vaavo evolithanu yaamuvanry'aya-vo, kihela matata nipuro nenlo khwira, "Pwiya, yoolepwa mwa Masu Anyu, 'Anoonyakela miru sa inowa ni anamareere, ni khiyaavo enrowa waatakhalaha hata vakhani.'" Nto okathi ene yoole, owereya wothene khuhiya nnawo nawe. Khuwara ixapattho sawe khumiserya nihiku nothene.

⁴¹ Khurowa ohiyu yoole khwaahimeerya yeeyo, awo khwira, "Vanreerela nyuwo murowe wa tothoro."

⁴² Owo khwira, "Vakhala wira Muluku ookikhapelela mpakha va, Owo onookikhapelela onkela ephiro." Hiyo naahimiserya mahiku mararu, woohiwereiwa hata vakhani.

⁴³ Muluku nlelo Mulukuu. Owo onnimusuka khula natiri. Ni mwa muteko aka wothene, eyo emara yoopacerya otonko aka

omoono Muluku orwa vooluma w'enowa, okhala wira yaari emara yoopacerya otonko aka okhalana okathi wo omuvekelela mutthu olummwe ni enowa. Wira oosuweliheni paahi wira Owo onnaasuka anatiri Awe othene, ni Masu Awe t'oreera ni eekeekhai. Amen.

⁴⁴ Muupuwele miteko sookokhorela ohiy'ula ni Enamararu enoorwa. Ni mmuvekelele mutthu vano vekeekhai omphavela ovekeleliwa, kikhale miyo. Ni, muupuwele, murowe vamuthukumanoni wa Munna Roberts waphiyaru opooma, ni mmukhomase okhuma mutapernakulu.

⁴⁵ Nihinatthi osoma Soolempwa, miyo—miyo kaatthuna wira nivenye neemele minutu mmosa paahi. Ni, woohikhala nsipo, nrowe niipe eyaakhulelo emosa wala piili paahi ya nsipo nla noovuwa na khalayi na mukereja, “Waamini Waka Onweha Wa Nyuwo.” Vaareera, atthu othene yitakanihe ni miyo vano, ni nrowe niipe. Ni muhuupuwele moota siniip'anyu, mwiipe paahi wa ovuwa wa Muluku. Munoonihoolela mwa nenlo, Munna Neville?

Waamini waka onweha wa Nyuwo,
 Nyuwo Mwaapwittipwitthi a oKalvario,
 Moopoli a omuluku;
 Vano mukiiwe okathi onlomp'aka,
 Mukumihe sootheka saka sothene,
 Oh mukihye okhuma nihiku nla
 Kikhale othene Awinyu!
 Okathi oneett'aka mmukattamihoni
 mooriipela a makhalelo,
 Ni oxanka otepaka waatta
 vamphwanyaney'aka,
 Nyuwo mukhale Muhooleli aka;
 Murukunxe epihi okhale othana,
 Mukumihe oxanka, ni woova,
 Muhikihye nnakhala kikhumelaka
 Ottaiwene wa Nyuwo.

⁴⁶ Ni miru sahu sowuurama, kaatthuna kisome mwa soolempwa sooreera sa Bibilia, Matewu Owaarya, ekapitulu 7, iversikulu 13 ni 14. Ni Apwiya yincererye iparakha Saya sinci-ene okathi onsom'ahu Yaawo.

Nvireke mukhora woophunyeya: okhala wira mukhora muulupale, n'iphiri yoowookowa, t'ile enroiha moorimeelani, ni anci-ene t'ale anvira yoowo:

Okhala wira mukhora woophunyeya, ni ephiro ti yoorika, enroiha mu'ekumini, vano ale amphwanyayo eyo ari vakhani.

⁴⁷ Nivekele. O Muluku, Ole omuruunhe-tho Pwiya Yesu okhuma mookhwaani ni okhuma mmahiye, ni onnooniherya Yoowo hiyo voosiis'ula ntoko Mukuttho mukumi, hiyo

vowiiyeviha ninnivahererya makhalelo ahu wa Nyuwo emara ekina, mwa miyuupuwelo wira Nyuwo mwaamukhala ookasoopa wa hiyo. Hiyo nryeene nlelo anatampi, ookhwa mutampini ni soottheke, Nyuwo moomuveleeliha Mwan'inyu mmosa-ene, ookhalihwa ntoko erutthu y'etampi, wira okhale mukottho woolivela itampi sahu, wira ole Oohittheke, ahaawaka mwaha w'ole oottheke, awerye onaataaniha-tho vamosa mopatthaanani ni Nyuwo.

⁴⁸ Nto, O Muluku, yaakhanleene etampi eriyari ahu voosiis'ula, etthu emosa khino enkhoottiha Eroho Yowarya oniruuhele hiyo Mutthaka wa Muluku wa khula mmosa wa mirima sahu, hiyo ninvekela, niyevihaka wira, Pwiya, Nyuwo munilevelele soottheke sahu. Munikukutthe ni Ephome ya Pwiya Yesu. Yoowo . . . Hiyo noosuwela wira, mwa mmansihu, hiyo khanihyo hat'etthu, ni hiyo ninnihimya wira khanihyo hat'etthu. Masi Nyuwo mwa ole oowaarya, Nyuwo mwa eekeekhai, Nyuwo mwa exariya, Nyuwo mwa Ephattuwele yeele ya ikharari. Ni hiyo vowiiyeviha nimpuruleya nirowaka vaavo olelo, ntoko minepa soottharuwa. Ntoko onamoona omanle ohimmwa, wa oJamaica ni wa oPorto Rico, ni weiwo Nyuwo muvanry'anyu miteko suulupale, O Muluku, eyo ethoonyeryo yo orwa wa Naxariya.

⁴⁹ Ntoko simuvulunx'anyu Munna Evans maino a sirimau eenowa ele, okhala wira owo aari mutthu-oowaamini, ni Masu Anyu okathi wothene t'ekeekhai. Vano, Pwiya, munivuluxe hiyo mwa maino a mookhwaani voosiis'ula, memmo nwanani onilumme awe ni onihelenly'awe esirimau. Muhiye murette anyu woovoniha, voosiis'ula, Pwiya, oponowele irooho sahu ni onikukutthe otakhala wothene. Nvonihe iretta sa irutthu sikokhorihwe n'uwerya wa nwanani. Othene ari Ohoolo wa oMuluku, awo evonihwe.

⁵⁰ Mulavule ni hiyo vano mwa Masu Anyu oolempwa, Pwiya. Nihisuwelaka etthu yoohimya, masi Nyuwo munoonivaha. Vano Nyuwo munilopole, Pwiya, ni munikhalihe oolikana mwaha w'Orwa Wanyu. Vano hiyo ninvekela yeela mwa Nsina na Yesu ni mwaha wa Yoowo. Amen.

⁵¹ Miyo okathi wothene kinnixeleliwa vakhani, okhala wira miyo kinnipisaka vano. Ni exikola ya Ttiminku, miyo kinoona wira, yoomala. Masi yookhala etthu mwaha wa yeeyo, okathi oniphiiy'aka owaani miyo kinoona paahi ntoko kirina okathi munci-ene. Nyuwo moosuwela, hiyo nnikhala oowaakuva vanci-ene, khula enamuna. Tivo, hiyo ninrowa omwaamini Muluku paahi.

⁵² Pwiya ahu aaleela olopola nno woolipa atthu a nloko Nawe, atthu yaari anatiini sana. Nto Owo khwira, "Mukhora ti woophunyeya, ni ephiro ti yoorika, enroiha mw'Ekumini, ni anookhala vakhani anrowa ophwanya Yeeyo." Vano, khayari mwaha wa awo ohikhala anatiini. Awo yaari anatiini sana. Ni

okhala wira awo yaaroromenle ekereja ni iyaminelo kamosa kamosa ni miromolelo, ni yaanimwaamini Muluku (mpakha vatthu), awo yuupuwel'aya wira itthu sothene saari sana. Masi Owo aahimeerya awo wira yaamukhala vakhani yaarowa ovolowa.

⁵³ Nto miyo kinnixanka voosiis'ula sinto nkaawerya olikanyiha nloko nle ni nloko nla. Moone, waari woomaleloni w'okathi wa aYuta, nto Owo aatthikela-tho ohimya maloko oovirikana ni imalelo soovirikana sa okathi woovirikana, ni aahimeerya yaawo wira etthu emosaru yeeyo yiiriwe okathi waavinre yaaniiriwa ohoolo waya. Nto awo khuvonya osuwela yeeyo. Nto nrowe noone itthu kamosa kamosa Owo aahimy'awe.

⁵⁴ Awo, mwa nlikanyiho, khayaawerya waamini wira Muluku aari mwa Mulopwan'ole. Owo waari muttiyelelo muulupale awo yaarin'aya wira eraramele, waari moota Owo aryeene Mutthu masi iikhaliha Mmansawe Muluku. Awo khayaawerya wona moota xeni Muluku aawery'awe okhala mw'erutthuni ya mutthu. Ni okathi wothene, okathi wothene, Muluku okathi wothene aakhala mwa mutthu. Mutthu ti namuteko a Muluku. Mwa khula nloko, Muluku onlavula n'atthu Awe ni iyano sa mutthu. Owo okathi wothene onimuthanla mutthu mmosa wala etthu emosa Owo onwery'awe orumeela.

⁵⁵ Nto Owo aahimye yaawo, wira yaari ekwattulo, mwaha wa Abrahamu. Owo khwira, khaahimeerya wira, "Mwaaaisiihanaka 'aana a Abrahamu,' Abrahamu 'tith'inyu,' owo aahoona nihiku Naka ni khutthapa mwaha wo wona nenlo. Abrahamu, profeta." Ni vekeekhai Yesu aahimya yaawo wira Owo aahiwooniherya wira Owo aari Mesiya, okhala wira ethoonyeryo ya Mesiya yaanimutthara Yoowo. Ni yaahikhala siiso muhina ya khula nloko, ele, ethoonyeryo ya Mesiya. Masi nlelo Owo iikhalihaka Mmansawe Muluku, Mesiya Mwaneene, eyo yaahaakwattula awo. Awo khayaawerya osuwela eyo.

⁵⁶ Vano, okathi Abrahamu (yoowo awo yaamwiihan'aya tithi aya) okumanne awe ni Muluku, Owo nave aari mw'erutthuni, okhala wira Owo aahikhuura enama ya mwanyompe, aahikhuura mukatthe wa nakhuwo (ni aahiwurya eleethi) ni manteeke, ohoolo wa Abrahamu, nave nlelo Owo aari Muluku. Abrahamu aahimusuwela Yoowo, Muluku, nto khumwiihana Owo "Elohim," yoowo okhanle Yehova Oowerya sothene. Mutthu aawanre ikuwo, ni ntthupi v'Erutthuni Vawe, nto khukilaathi vathi va mwiri, mwaha wa muuttutthi, khikhuura enama ni khiwurya eleethi. Vano aYuta ale oohicaliwa, ootakhala murima, owiisuupuwela, ni anaxariya khayaawerya waamini wira Owo aari Mwana a Muluku, ni yaamwiihana Abrahamu okhala tithi aya. Vano Owo aamwaasuwereliha wira Owo iira itthu imosaru, mw'erutthuni mw'Awe, seiyo Muluku iiraly'awe mw'erutthuni ekina okathi Owo aakumananne awe tithi aya, Abrahamu. Ni Abrahamu aahaamini eyo. Vano awo khayaawerya waamini eyo.

⁵⁷ Nyuwo moone, okathi Abrahamu aakilanthi awe vathi v'eheema awe okhala wira owo aahithanla, ni othanla iwo oniruuihiwa ohoolo wa khula mutthu oniyariwa molumwenkuni mu. Mwiri wa yooreera ni yootakhala oniheliwa ohoolo wa khula mutthu. Nto okathi Lothi, musulu awe, ni amakhampusi aya apacenry'aya onyakulihana mwaha wa mathala; Abrahamu, aryeene mutthu naxariya, aahahimeerya, "Ohikhale onyakulihana paahi eriyari ahu. Muthanle paahi ephiro anyu y'orowa." Ethhu iyo ennikhumelela mmakhaleloni wa khula mutthu-oowaamini. Ni eyo eri ohoolo wanyu voosiis'ula, ni eri ohoolo waka.

⁵⁸ Lothi khuupuwenle wira aamurowa ohiya waamini, masi owo aaweha aluluwanyaka oSotoma weiwo itthu saary'aya sookhweya. Nto sookhala imara sinci-ene hiyo ninweh'ahu ephiro yookhweya. "Miyo kinimwiitakaniha ni ekereja khata khata ela, ni, nyuwo moone, khaavo mutthu onrowa ohimya hat'etthu avirikanyaka yeeyo, okhala wira eyo ti ekereja yuulupalexa mmuttettheni." Ephiro yookhweya! Imara sinci-ene hiyo ninniira yeeyo, okathi, hiyo nivonnyeene!

⁵⁹ Muupuwele, nyuwo mwaamuttharaka Kristu, nyuwo munoonyokhiwa n'atthu, maana othene ale ankhala ni exariya mwa Kristu Yesu anoophwanya olupatthiwa. Ni nyuwo mwarwa wa Kristu, khamunrowa orwa ni hata ekereja wala hata muromolelo, wala hata eyaminelo. Nyuwo munrowa orwa ni Ephome, eyo ti ephiro emosa paahi y'ovolowana. Ni khamunimuruuha hata mutthu ni nyuwo, munrwa meekh'inyu ni munookhala ni olapa wanyu ni waamini wanyu. Nyuwo khamunrwa mukuxiwe ene ni pastore, wala waamini w'amey'anyu. Nyuwo munoorwa ntoko mutthu mmosa mwaarw'aka wa Muluku! Ni imara sinci-ene hiyo ninniira ithanlelo iye s'elolo.

⁶⁰ Ankhi Lothi, okathi woonaly'awe itthu sothene okhweya...? Owo oonne otthu waari-wo musurukhu munci-ene ni osuweliwa wunci-ene, okhala wira owo aamurowa okhala muletto, ni mutthu mulavilavi, oosoma, pisikoloxia yinci-ene, ni aamuwerya wira itthu kamosa kamosa ni nlelo alipiheryaka etiini awe. Owo aahuupuwela, "Miyo kinimwaamini Muluku, tivo miyo kinoorowa mpakha oSotoma ni miyo—miyo kinoophwanya musurukhu mukina, ni kinookhala mutthu muulupale, khino mulaleyi oottittimiheya." Moone, nyuwo mookhalana ethanlelo yo wira.

⁶¹ Ni mukristu pure ookhalana ethanlelo yo wira. "Miyo kinoorowa mpakha ekereja khata ela iwe. Oh, atthu othene a mmuttettheni anuupuwela wira ela yuulupalexa! Vano, mukhulupale a mpooma oniira mpantta a ekereja yeela." Vano, owo aamuwerya wira mpantta a ekereja yaari yooreera veekhai, masi nlelo nyuwo muhaana olamula ekerej'eyo n'atthu aya muttharihaka Soolempwa. Imara sikina awo

anoorowa okhala wira eyo ephiro yoosuveliwa, a—atthu anniwara oratta-ene anrowa mapuro kamosa kamosa. Nto ti vaavo hiyo nniir’ahu n—nvonyeryo wowiiva. Vano nwehe ela.

⁶² Nto Abrahamu, etthu emosa owo aawery’awe wira waari okuxa ethanlelo ya nenli. Nto imara sikina ethanlelo ya nenli ti yooreera ovikana yoopacerya, yakuxiwaru siiso. Nwehe, khivaapinse vanci-ene, okathi Lothi oonne awe muttethe muulupale, enamwi, owo ahaawonne amwaar’awe ethatuwaka eruwa ya maakha, owo khoonne mooro opahaka muttethe. Masi Abrahamu aakunxe ephiro n’ale vakhani oothanyiwa a Apwiya. Owo aahikhala mothakoni.

⁶³ Nto, nlelo, anki Sara aakhanle oohimya wira... Vano muupuwele, Sara aari muthiyana ooreerexa mmuttettheni mothene. Khaakhanle hata muthiyana ooreera ntoko Sara. Atthu othene, yaamona owo, yaanisiveleliwa ni yoowo. Vano, moota yaarow’aya okhala etthu yookhweya Sara wira ethanlelo ntoko yeeyo. Masi owo aathanlale okhala ni Abrahamu.

⁶⁴ Oh, athiyana, muhimuhye xetwani woopwexani maitho, mukhalaka oosuveliwa ni mwiitakanihaka *n’ila* ni *ile*. Mukhale ni Kristu! Maana, okathi ori vakhiviru, ohononiwa wuulupale w’elapo ela ori ohoolo, wootepa ovikana Sotoma ni Komora. Sotoma ni Komora sinookhala sa ntittimiho wa yeela.

⁶⁵ Vano, okathi Abrahamu aathanry’awe ephiro aavahiy’awe ni Muluku, ni aarina epantte yoohaawaxa y’ethaya, owo khaaruwenrye nnakhala. Masi nlelo owo aanisuwela etthu emosa, owo aanimurumeela Muluku ni aanimwaamini Muluku.

⁶⁶ Tivo nihiku nimoso yaahirwa axilopwana araru, ni awo yaari oosareya ntthupi ni ookhulumuwa, vano Abrahamu aahiwoonelasa othunku, owo khwira, “Murwaase mukilaathi vathi va mwiri karvalyo okathi vakhani paahi.” Nto owo eemenleene vaavo alavulaka ni yaawo, owo aahisuwela wira ale khayaari atthu pure paahi, mwa elavulelo aya. Awo yaahivirikana. Nto Abrahamu aahirowa khumwiiva mwanyompe ni aahimuluka, ni khumwiirela Sara wira apake mukatthe khulikanyiha wira aalyihase.

⁶⁷ Vano muupuwele, anli a awo yaari Malaikha, Malaikha mw’erutthuni ya mutthu, nto mmosa a awo aari Muluku Mwaneene. Nto Ole aari Muluku aarina ettuli Awe erenryeene eheema.

⁶⁸ Ni Sara aari muheemani. Miyo okisivela omoona muthiyana okhala voopuroni vawe siiso, kahi okhuma ni waahimeerya aiy’awe etthu yo wira, ni khula okathi mutthu onrw’awe oxekurya. Masi owo aari muheemani. Vekeekhai, khino arapihaka iparatho wala iiraka etthu ekina.

⁶⁹ Nto Ola mmosa Yoowo aari Muluku, Owo aakhala awehawehaka oSotoma, ni Owo aahahimeerya etthu aarow’awe wira. Nto Malaikha manli yaaronwe mpaani mme olaleerya

Ehaphari yooreera. Masi Mmosa aahanle ottuli, owo aari Ole aari Muluku, vano Owo khwira, “Miyo nkinrowa omuvitherya Abrahamu isiiri Miyo sinsuwel’aka, okhala wira owo onrowa okhala murithi a elapo.”

⁷⁰ Oh, hiyo nookhalana ehakhi voosiis’ula, ekereja, osuwela isiiri sa Orwa w’Apwiya. Maana, “Ooreeriwa t’ale amphavela murettele, animwiihaniwa aana a Muluku. Ooreeriwa t’ale anvoliwa etala ni ntthona, awo anoovona. Ooreeriwa t’ale ooreera murima, maana anoomoona Muluku. Ooreeriwa t’ale oowimaaliha, maana animwaakhela elapo yoohiyeriwa.” Vano, vakhala wira ekereja ya Muluku mukumi eri wira erithi elapo, khiyaavo hata isiiri evitheriw’aya.

⁷¹ “Sothene Atithi akilenly’aya, Miyo kihoolelani,” ohimnye ti Yesu. Nto awo khayaawerya omwaamini Owo.

⁷² Tivo mahiku a Abrahamu, ntoko Owo saahimeery’awe awo, Owo iirale wira ntoko Abrahamu aalavul’awe ni Nlaikha, ni ettuli Awe aarenrye eheema, vano Owo khimuhimeerya Abrahamu wira Owo aarowa omuthotola ni mwaana. Nto Sara, muheemani, khutheya. Vano Owo khwira, “Sara otheyenleni?” Exeni Owo oonihery’awe? “Sara otheyenleni?” Saari iwora vakhani paahi ehinatthi ohononiwa elapo, okathi yiiraneiyeye aya eyo. Okathi vakhani ohononiwa ohinatthi wiireya, mooro ole khirwa okhumaka wirimu khupaha muttethe, nto ekhanyeryo ele yaahipakiwa.

⁷³ Nto Yesu khwira, “Nyuwo munoovonya,” aahimeeryaka asuweli aalupale a divindade, elapo y’etiini weiwo vekeekhai atthu imilyawu sene yaary’aya oowaamini. Owo khwira, “Nyuwo munoovonya, ohisuwelaka Soolempwa hata Owerya wa Muluku.” Wa nloko ntoko nle, yaari atthu owiixuttithiwa sana, yaari asomi ni ooleliwa mukereja. Okathi waayariw’awe mwaana, aakhala a mukereja. Nyuwo mwaahaana okhala mwIsarayeli. Mahiku mathanu na mararu numala oyariwa, waari olyihiwa masoma, nto nyuwo mwaari mwIsarayeli opacerya wene. Ni onamukuttho waakhuma w’aLevi, yaawo yaari owiixuttithiwa miyakha imiya sene mwa Soolempwa. Nnakhala vo Yesu khwira, “Nyuwo munoovonya, ohisuwelaka Soolempwa!” Awo yaasuwela mwa eliivuru aya y’osoma, awo yaasuwela iyo ni katikesi aya, awo yaasuwela iyo ni teologia aya mmansaya. Masi Yesu khwira, “Nyuwo khamunsuwela Iyo, Soolempwa, hata khamunsuwela Owerya wa Muluku. Mwaamusuwenle-ru Abrahamu, maamukisuwela Miyo. Mwaari aana a Abrahamu, mwaamukisuwela Miyo, okhala wira Abrahamu aahitthapa voonaly’awe nihiku Naka, maana owo aahoona nihiku khalayi ene. Okathi Miyo waakhanly’aka ni yoowo ottuli wu, mw’erutthuni, khwiira yeela, owo aahisuwela wira kaari Miyo, ni owo khukiihana Miyo ‘Elohim.’ Masi va Miyo kiniira etthu emosaru ohoolo wanyu, nave nyuwo munikiihana Miyo ‘Pelizepuli.’”

“Oh,” awo yiira, “hiyo nookhalana tith’ihu Abrahamu.”

“Munimwiihana Abrahamu ‘tith’inyu.’?”

⁷⁴ Owo khwira, “Vano, hiyo, hiyo nniira mpantta wa ekereja. Hiyo na elapo y’etiini. Hiyo n’atthu aalupale. Hiyo n’atthu a Muluku!”

Yesu khwira, “Nyuwo mwa a xetwani, owo ti tith’inyu.”

⁷⁵ Miyo kinlattaniha nloko nle ni nla, olelo, vakhanly’aya veekkhai athu imilyawu sene anihimya oKristu, nave ahinsuwela hata etthu ya Muluku onvikana Hotentote aarow’awe osuwela ohiyu wa wEjitu. Aakhala alopwana n’athiyana olelo, veekkhai imilyawu sene anihimya okhala aKristu animuromola Kristu, ahinsuwela nikano noopacerya na Owerya w’ohihimuwa Wawe, ni ahinatoko olawiha ereerelo Awe murima. Awo khanatoko woona Owerya Wawe. Maitho aya t’ohoona Ekeekhai.

⁷⁶ Khwira, “Nyuwo alipa-oohoona, muniweettiha alipa-oohoona. Khani. . . mu. . . mulipa-oohoona amuhoolaka mulipa-oohoona, othene aya khammorela mulittini?”

⁷⁷ Vano awo khuupuwela, “Hiyo n’aKristu. Hiyo n’atthu-oowaamini. Hiyo nniira mpantta wa ikereja suulupalexa sikhanye. maRabbi ahu asuweli owiixuttaxa akhanle.” Nave nlelo Yesu khwaahimeerya wira awo khayaasuwela hata Soolempwa.

⁷⁸ Munnoona moota Muluku iipitiheny’awe maitho a ale oosuwela ni a miruku, khiwuupululela anamwane wira awo yiixutte? Oh, Owerya wuulupale ni ohimala wa Muluku! Moota Owo siry’awe ooreera murima w’ale anthuna weetta oororomeleya wa Yoowo! Owo khankhoottiha hat’etthu yooreera.

⁷⁹ Nto woona nihiku okathi elapo ahu, olumwenku ahu, ohononeiye aya n’itthu emosaru yeeyo!

⁸⁰ Yesu aatthunne owookolela wooreera-vo. Awo khwira, “Oh, Abrahamu ti tith’ihu. Ni hiyo nnoorowa okhala mOvuwani, Nyuwo muhiikattyamihe ni yeeyo, okhala wira hiyo ninnimwaamini Muluku. Hiyo ninnitthara, ni ninnimwaamini Muluku, ni ninniwiixuttiha athu ahu. Nto Nyuwo mw’ani munoorwa va ni e—ethoonyeryo ya mwiiriirya yaamukhaani ni ya khalayi ni weererya wiihana yeeyo Muluku? Nyuwo khamuhiyo hat’etthu woohikhala Pelizepuli.” Eyo eri vo, awo yaarina iyaminelo saya ni muromolelo aya.

Yesu khwaahimeerya, “Nyuwo mwa a xetwani.” Nkuupuwelani yeeyo!

⁸¹ Nto miyo kinlattaniha nloko nle ni nla, olelo okathi orin’ahu athu imilyawu sene aniitakaniha mmakerejani, nookhalana ikonto miloko sene. Ni Muluku onookhuruwa wira okhaleke mukereja mwAwe tho, ni wira iire itthu imosaru

seiyo Owo iiraly'awe iwe, wira iikhalihe Mmansawe mmosaru nsana, olelo, ni mahiku othene. Nto atthu anoorerya ettuli aya yeeyo, voohihyererya, akina wira ekhale oosuveliwa, akina wira ekhootte othanla. Eyo enookhanyereliwa atthu! Nyuwo muhaana othanla. Khivanweryaneya nyuwo okhala siyo. Nyuwo muhaana wira "ayo" wala "nnari." Nyuwo khamunrowa okhuma mukhor'ole mutthu yoole muvolonw'anyu. Khivanweryaneya nyuwo wira eyo. Nyuwo mookhalana ethanlelo wira mwiire. Mmwiirele Kristu voosiis'ula.

⁸² Awo yuupuwela wira othene ale yiira mpantta wa mukereja yaamoopowa. Yesu khwira, "Mukhora ti woophunyeya, ni ephiro ti yoorika, vano ale amphwanya eyo ari vakhani."

⁸³ Mukihiye koolopoleni voosiis'ula, ekereja, mwiikasoope. Eyo eniiraneya olelo, munlokoni mwahu noowiihimya exariya, noowiihimya omalela ni n'enamirima miili hiyo onikhal'ahu-mo. Okathi alopwana n'athiyana ankkal'aya mukereja ni ikhukulu sa mukereja, ni wiipa isipo sa Muluku, ni okhumela ota wa ekereja ele ni waapaha asikaro, ni omuwurya wiskhy, n'urowa wiina, ni—ni okhalela olumwenku, n'ulavula iperwa soonanara, ni soohilakeya, ni wiisiihana "aKristu." Okathi alopwana n'athiyana anwery'aya okhuma vapulpitu wala mukereja, ni okhuma nipuro na Owerya wa ohihimuwa, vaavo ethooneryo yeele ya Mesiya eneetta aya eriyari aya, ni ohikhala mutthu musya mwa Kristu, yookhala etthu evonyeiye. Okathi ixornale sinveeh'aya yeeyo; ni okhuma olimani mpakha olimani, nno ni iwe, okhuma mapuro ooriirya a epantte Onkela epheyo mpakha itakhwa sa miri soorakamaxa s'Okuusini, Muluku onooveleeliha ela, nave atthu voohihyererya anrerya ettuli. Vano nihimyeke exeni, niireke exeni? Hiyo ninthikela mwa Soolempwa memmo Owo ohimmy'awe wira, "Mukhora ti woophunyeya, ni ephiro ti yoorika, vano ari vakhani anrowa ophwanya."

⁸⁴ Owo ohimnye wira, "Ntoko saary'aya mahiku a Nowe, siiso enookhala Orwa wa Mwana a mutthu." Nwiriyan, mahiku a Nowe, olumwenku waari woosareya atthu woophiyaka ntoko siry'aya olelo. Siensia aya aahinvikana awihu. Awo yaaniteka itthontto isfinxe ni ipiraamite ni yaaniira itthu hiyo sihinwery'ahu wira olelo. [Nipuro vahiitthu mufiitani—Mol.] Atthu owuunnuwa, aalupale, ni alavilavi. Nto muupuwele, siensia olelo oniira, "Minutu mmosa ohinatthi ophiya ohiyu eriyari." Minutu mmosa eroroco ehinatthi ophiyerya ewora y'okhwa. Vahooxa ovikana sinuupuwel'ahu. Miyo kinwehererya wira e—kinroromela wira Eroho Yowarya enoopwiniha ela mmurimani wa khula mutthu-oowaamini, "ntoko mahiku a Nowe"!

⁸⁵ Akavi yooponwe mahiku a Nowe, muhina wa nloko nle? Athanu n'araru, athanu n'araru muhina w'atthu imilyawu sene.

Owo ohimnye wira, “Siiso enookhala Orwa wa Mwana a mutthu.”

⁸⁶ “Ni ntoko saary’aya mahiku a oSotoma, siiso enookhala Orwa wa Mwana a mutthu.” Muhina wa ikonto miloko sene, yaari araru yooponwe.

⁸⁷ Nyuwo mwaamukiirela nto, “Mulaleyi, ankhi ale ikonto ikonto sene anrowa orwa ni Yoowo?” Vano, munna, awo yaathukumanyiwe muhina wa maloko manci-ene.

⁸⁸ Miyo kinookhala ootikinihiwa yakhumaru etuusiya ntero nloko nla. “Mukhora ti woophunyeya, ni ephiro ti yoorika, vano ale amphwanya eyo ari vakhani.”

⁸⁹ Oh, miyo kinnisuwela ikereja, etthu iyo sinihimy’aya, “Nyuwo mwahelaru nsina nanyu muliivuruni ni wira mpantta, *ela*, nyuwo muri sana.” Khekhanle hata Yoolempwa ntoko yeeyo. Vakhala wira sothene sookhalana nsina naya muliivuruni, ni mu—mukereja, sinookhala ipilyawu imara ipilyawu imara ipilyawu sene, itthu sothene sinookela. Nto khula muthinto wa irooho sinookhala memme, nto mukhalelo xeni onrow’aya okhala Wirimu? Nkuupuwelani yeeyo vano.

⁹⁰ Aamukhala mutthu aarowa okihimeerya wira, “Vano mulipelele minutu mmosa, Munna Branham. *Lexe ni lexe*, miyo koowiiwasa olavula ilavulelo, miyo koosuwela wira awo anookela.”

⁹¹ Eyo khenihimya wira awo anookela hata vakhani. Paulo oohimya, mwa aKorinto Oopacerya 13, “Hata kaamulavula ilavulelo s’atthu ni malaikha, kihirina ophenta, nkihiyo etthu.”

⁹² “Oh, miyo kaahirowa omuthukumanoni wa *lexe ni lexe*. Oh, owo aahivara miteko suulupale, sa ikuru. Miyo koomoona owo owooniha alipa-oohoona.”

⁹³ Nnakhala vo owo pooti opweteya. “Anci-ene animoorwa wa Miyo nihiku nle wira, ‘Pwiya, miyo nkilaleenrye mwa Nsina Nanyu, nkihimnye s’eprofeta? Miyo, mwa Nsina Nanyu, nkoomonle irooho sootakhala? Miyo, mwa Nsina Nanyu, nkivanre miteko suulupale?’ Owo onrowa wira, ‘Mukhume wa Miyo, nyuwo muniira sootakhala, Miyo nkinatoko hata woosuwelani.’” “Mukhora ti woophunyeya, ni ephiro ti yoorika, vano ale amphwanya eyo ari vakhani.”

⁹⁴ Mukihiye kooleleni esisapo enrowa wootutuxani. Nittharihaka siensia a matothoro, epooma y’oChicago, nittharihaka iyaalikelo sa matothoro, sookhala miyaha soohononiwa erukulu ikonto miloko miraru oChicago paahi, muhina wa mahiku miloko miraru, matothoro arin’aya. Ikininu kavi iya saamukhaani n’itthu awo anwuryasaaya, s’ohonona erukulu?

⁹⁵ Iyaalikelo sinooniherya wira, oEstadu Unidu, aakhala aana ooraruiwa ovikana siry’aya ale ooyariwa muhina

w'othelana wooreera. Mwaahisuwela wira Biblia oohimya, mwa Otumererya 14:2, wira “mwaana ooraruiwa, yaamukuxa miyakha imiya xexe wira eyo emale”? Aana a an'aya, an'aya, an'aya, an'aya, an'aya khankhala mmuthukumanoni mw'Apwiya, miyakha imiya xexe, maloko muloko. Miyakha miloko mixexe mwa nloko nimoso. Pwaapu awe atithi aya, atithi aya, atithi aya, atithi aya, atithi aya, atithi aya yaari mwaana ooraruiwa, owo ori ota wo otthokeleliwa! Vano exeni? Mukoonihe vatthu eyo evirikanihiw'aya.

⁹⁶ Nimphiyerya vai? Nto vano aana ooraruiwa, mwaha wo oraruwa, n'axithiyana anatampi mphironi anwara ikuwo ntoko alopwana, yeeyo eri yoonanara vamaithoni va Muluku, anammupaha sikaro, anamawurya a soowurya sootakanxiwa, anihimmwa wiisihana aKristu. Muluku anaakiherye nikhuru nene nenlo n'anamittompe! Eyo ekeekhai. Vano aniisihana aKristu? Khivanxankiha Yesu sihimaly'awe wira, “Mukhora ti woophunyeya, ni ephiro ti yoorika, vano ale amphwanya eyo ari vakhani.”

⁹⁷ Awo khanrowa wiiveviha. Awo t'othipelela. Nkawehani, okathi David aahimeeriw'awe etampi awe owo iiralyaawe, naanaanoru owo aahirukunuxa murima, vano Muluku aahimpenta mwaha wa yeeyo. Nyuwo mwaahimeerye itampi saya, awo animwiira, “Miyo nkinkhalakhala kitthikelaka emp'ela.” Mwaha wa xeni? Awo aakhalana mapuro manci-ene oorowa, awo anoowerya orowa miithe iye soohitthara ikano anrow'aya olikana ni seiyo. Masi okathi wa alaleyi owara ikaruma soomalela sa Muluku ni olaleerya Masu woohisakaleliha, Ehapari yooreera. Axilopwana yaahaana wiiveviha.

⁹⁸ Khokhanle-tho onaxariya varyari va aKristu. Awo antthuna yiireke, “Miyo ka mMetotista, miyo ka muPatista, miyo ka muPentekosite,” eyo khenihimya wira [Munna Branham onrumiha ikatha sawe—Mol.] eyo wa Muluku.

⁹⁹ “Miyo koolavula ilavulelo, miyo koopaka miiriirya.” Hiyo nnihela waaluxa wothene mwa yeeyo, eyo ekhanleene emosa wa ithu sootepexa oriipiha wiitho awo yaarow'aya owerya wira. Vekeekhai. Epula enimurupela naxariya siiso ntoko enimurupel'aya ole ootakhala. Epula enninaaniha epyo siiso ntoko ennaanih'aya nthakathaka, Roy. Epula emosaru, Eroho Yowarya emosaru ennaamorela atthu. Eyo nlelo khenihimya wira...Mukhalelo aya ohaana okhala woovirikana, okhuma muhina mpakha ota. Kahi ethoonyeryo wala mooniheryo w'ota, masi Eroho ya muhina ya Muluku mukumi enimukhaliha mutthu uwo musya, eniyeviha murim'awe mulopwan'owo wala muthiyan'owo ohoodo wa Muluku.

¹⁰⁰ Nyuwo muniira, “Mulaleyi, muntthuna okileela wira nyuwo munoohoverya wira anookhuma etuusiya ntero muhina wa atthu

ala imilyawu ni ipilyawu xexe mulaponi?” Miyo kinnihoverya sinto anookhala etuusiya ntero anrowa wira mpannta wo Okuxiwa. Nkuupuwelani yeeyo! Miyo kinooleelani ele Yesu ohimmy’awe va muhina wa Ehapari yooreera. Nkuupuwelani yeeyo!

¹⁰¹ Eyo ephiyenrye exeni? Okhala wira ohilakeya oookela eriyari y’atthu, aana ooraruiwa khupacerya oyariwa, eyo ennaariipiha. Moone, naamuwerya okhala vaava iwora sene, nihimyaka itthu iyo, ni nyuwo munoowerya woona wira ninkhala munlokoni n’atthu oohononeya, ohukhumweya, oowunta vooamela. Khivanxankiha awo ohiweryaka woona hata ekhanyeryo, khivanxankiha awo ohiiwaka Ehapari yooreera, awo t’olipa murima, nave anatiini ni oothunku.

¹⁰² Yesu khohimnye wira, “Eroho ennihimya vowooneya wira, mahiku ookiserya awo yaarowa okhala oothipelela, owiisoona, oosiveliwa ni sooreera sa vathi onvikana Muluku, oohaatanihya, oohisumaaliha, ootakhala murima, oowaathanya ale oreera murima, yooneyaka ntoko oothunku?” Munnona? Oh, nyuwo pooti okhuwela, vekeekhai. Nyuwo pooti olavula ilavulelo, vekeekhai. Waamini onoooomola axetwani, vekeekhai. Masi eyo kahi ile hiyo enihimy’ahu.

¹⁰³ Vano nyuwo mwaamukihimeerya miyo, “Munna Branham, t’ivi ekhanyeryo ya muKristu? T’ani onrowa woopowa? Ti nyuwo, Munna Branham?” Miyo kinroromela eyo wa Muluku. Miyo nkisuwente. Miyo kinimwaamini wira kinimooowa. Miyo kinlikanyiha makhalelo aka, khula nihiku, ni Masu. Awo yaahikhaleke ntoko Masu ala, nto yookhala etthu evonyeiye, kihaana otthika kalokiherye.

¹⁰⁴ “Ahe,” mwaamwiira, “Munna Branham, atthu yaalavulaka ilavulelo, eyo khenihimya wira ahoopowa?” Nnari, mulopwana! Nnari, vekeekhai! Miyo kinniwiwaka anamirette n’akhwiri olavula ilavulelo, khula enamuna y’onomukhwanepa. Miyo kinniwoonaka atthu olavula ilavulelo nave ekhalaka ni mwaara a mutthu mukina. Miyo kinniwoonaka atthu olavula ilavulelo, ni otupha osulu ni vathi ni okhuwela ntoko wira empa enoopaheya, nave n’ukhuma ni waapaka anakoso eelavilavi, ni wiiya, wootha, ni itthu sothene. Munwerya sai nyuwo owehererya yeeyo? Nnari, mulopwana.

¹⁰⁵ Okhala a mukereja, matiyakono mukereja, ooreera murima ntoko sinwery’aya okhala. Vano, nyuwo munuupuwela wira awo yaamurowa omuthuma kasolina Ttiminku? Nnari. Masi Sekunta animwiira etthu yoonanara ni yoowunta ni ya vathi. Muluku onkhala mmurimani, kahi etthu y’ota, eyo etthu enikhuma mmurimani.

¹⁰⁶ “Mukhora ti woophunyeya, ni ephiro ti yoorika, vano ale amphwanya eyo ari vakhani.” Ntoko saary’aya mahiku a Nowe, athanu n’araru w’ale imilyawu sene; ntoko saary’aya mahiku a

oSotoma, araru w'ale imilyawu sene; siiso enookhala orwa wa Mwana a mutthu.

¹⁰⁷ Nto nyuwo munnoona ohononeya oryaahu-mo. Nyuwo moone moota otthokelela wothene, mutthu, owo onookhuma vale ni xetwani onaakhaliha alaleyi alavilavi okhala vapulpitu ni waahiya atthu erowaka ni yeeyo.

¹⁰⁸ Nihiku nlo mutthu mmosa iirale, “Miyo nkaarowa okhalana nyuwo vapulpituni vaka, nyuwo mwaamwaakhaliha axithiyan aka onaanepa.” Nnari, awo aamala okhala siiso. Eyo yaamwaahokoloxerya muupuwelo aya wooloka, mwaaleele iwe wira eh iyase owara ikuwo iya n'itthu. Nto, ahe, ohaana okhala mutthu oniira eyo.

¹⁰⁹ Miyo kaahahimeerya amwaar'aka, “Miyo kinikhala namukhwa-anepa, yoomi? Miyo koovahuwa? Wala, exeni enikiira miyo?” Etthu emosa mmurimani khenwerya omaala. Miyo kihaana ohimya Eyo, miyo khenikicala etthu mutthu onihimy'awe.

¹¹⁰ Eniiriwa, “Nyuwo munoothonona muteko anyu.” Ahe, khula muteko Ehapari yooreera onrow'aya ohonona, ohaana ohononeya.

Muluku anivahe ominyala murima wira nikhaliherye ele eri Ekeekhai ni ohimya Ekeekhai wa yeeyo! Eyo etampii, otakhaliwa!

¹¹¹ “Mukhora ti woophunyeya,” oohimya Yesu, “ni ephiro ti yoorika.” Ni nyuwo muniwuupuwelela atthu imilyawu, ni othene nyuwo aMetotista, aPatista, maPrespiteriyano, aPentekosite evolowaka, nyuwo munootheipiwa nihiku nno. Yesu ohimnye wira, “Anci-ene animoorwa ekilaathi moMweneni, yiire, ‘Miyo kookhalana ehakhi y'okhala va.’” Owo ohimnye wira, “Masi aana a moMweneni anoorowa owoomola. Onookhala wunla ni olumanyiha maino.” Vanreerela wira eyaalikelo voosiis'ula, muKristu. Anookhala imilyawu miloko sene imara ipilyawu sene s'aKristu owiihimya, ni a nthiti makhalelo aya, anrowa ovonya mukhora. Yesu ohimnye siiso.

“Akavi anrowa ovolowa?”

¹¹² Miyo nkisuwenle akavi anrowa. Etthu emosa paahi ti, “Muluku, akihiye miyo kikhale mmosa a yaawo!” Ti yeeyo. Owo t'ori Mphuki. “Akihiye miyo kikhale mmosa.”

¹¹³ Nyuwo muniira, “Munna Branham, muniwerya sai ohimya nto akhala muKristu?”

¹¹⁴ Miyo nkisuwenle. Masi mukihye kooleleni ele Yoolempwa enihimy'aya. Vekeekhai nyuwo munnaamini Iyo. Okathi Eroho Yowarya eveleelihiw'aya mulaponi, Muluku aalavunle mwa Eroho Yowarya. Owo aarumme Nlaikha orowa—orowa, toko. Vano Owo khwira, “Rowani mwaviravire muttethe ni eriyari

y'atthu, ni muhele ekhanyeryo vayuuci vaya, w'ale annyakulela ni okhuwela mwaha wa itthu soowiitta, ettharuxaka itthu iyo."

115 Wiitta exenii? Muthiyana onrowa owara ekuwo eri ya mulopwana. Eyo ennimwiiraha Muluku weettiwa murima. Nyuwo mootoko weetta vakhiviru v'etthu eniitta? Moota eyo eniweettih'ayani murima! Khamunwerya ovilela. Muthiyana onrowa owara ekuwo eri ya mulopwana, ti siiso enimukhalih'aya Muluku; khino nyuwo muniipa mukoraaleni, khino nyuwo munnilompa khula nihiku, ni okhuwela khula nihiku, ni omukhalela Muluku khula nihiku, nyuwo munoolamuleya Ohoolo wa Muluku. Eyo vekeekhai t'ile Yoolempwa enihimy'aya. "Etthu eniitta!" Nto ale ankhaliherya etthu iyo anookhalana mpantte ni yeeyo.

116 Muluku anivahe mahala wira nikhaleke oohitthara etthu iyo. Vakhala wira muhaana okhala meekh'inyu, mukhale vaavo ni muvarelele Masu a Muluku mmatatani mwanyu. Awo khankhalakhala evonyaka.

117 Vano hiyo noophiya nihiku, vaavo, otakhala w'atthu. Nto Nlaikha ninnikhuma nitthittaka-tho. Mukaaverye mutthu mmosa oJeffersonville, mwaatthunaka vale osuwela t'ani onrowa wira mpantte wa yeeyo, mukaaverye mutthu mmosa mmuttettheni mwahu onnyakula ni okhuwela, oowuukhuwa ni oowooceya voohihyererya, ni olompaka mwaha wa soonanara siniiriwa mmuttettheni. Munniwerya ovenxa ntata nanyu mmuhelelaka nenno mutthu? Nto mukuxe Yoolempwa ela, "Mukhora ti woophunyeya, ni ephiro ti yoorika, enroiha mw'Ekumini, ale amphwanya eyo ari vakhani." Ti yaawo paahi yaari wira etthittiwe.

118 Oh, miyo kinoowerya owoonihani anci-ene anrowa okereja. Miyo kinoowerya owoonihani anci-ene aniipa mukoraaleni. Miyo kinoowerya owoonihani anci-ene ansomiha exikola ya Ttiminku. Miyo kinoowerya owoonihani akhanle muru w'a—w'atthu a maloko maalupale. Miyo kinoowerya owoonihani anci-ene ankhuwela, anci-ene anlavula ilavulelo, anci-ene anvara muteko wa Ehapari yooreera.

119 Masi mukoonihe mmosa ori owiiniwa murima muhina mwawe sana mwaha wa itampi sa mulaponi! Mukoonihe mulaleyi mmosa onwerya ovenya olelo ni wuulumela miromolelo iya. Mukoonihe mulaleyi mmosa onrowa ovenya ni ohimya itthu, ni wuulumela miromolelo iyo. Vanreerela owo ohiire, owo onimoomoliwa, eyo ettikitti awe ya yolya.

120 Khivanxankiha Billy Graham aamuhimenry'awe Jack Moore, wira, khanoona moota mithukumano saka sinkhal'aya, khwira, "Owo kahi muPatista, nnakhala mMetotista wala muPentekosite." Khwira, "Ni othene aya anoomuvirikanya owo." Vekeekhai, miyo nkinihimya wira...Tivo miyo ohimmy'aka wira, nkikhanle oohimya eyo v'atthuni. Miyo

kinihimya mukereja mwaka yoomi. Miyo kinwana ekhotto, okhala wira okathi wo weereriwa ori vasulu vaka.

¹²¹ Awo aniira, “Nyuwo mwarwa vale, enookhala yooreera, masi muhihimye hat’etthu ya Yeeyo.” Nyuwo mwaamukhala oowiinanela iphumu sanyu.

¹²² Miyo kinrowa olaleya ele Muluku onihimy’awe wira kilaleye! Eyo ekeekhaii. Mmosa a ale athanu n’araru onookhala nipuro nlo. Mmosa a awo onookhala nipuro nlo. Masi nihiku nlo nkinthuna okhala oottheke oohimya wira kihisakaleliha mwaha wa eyaaminelo wala mwiixuttiho wa ekereja kamosa kamosa, wala muromolelo. Miyo kinlaleerya Ekeekhaii!

¹²³ Awo aniira, “Nyuwo muhi, mwaha wa xeni muteko anyu ohi, Munna Branham, onikhala ntoko muulupale, ohinkhumelani mwa owerya ntoko axilopwana ala akina aniir’aya?”

¹²⁴ Ti yeeyo vaavo. Ti yeeyo. Miyo kinoorowa mmuttettheni, munuupuwela wira Asempeleya de Deus yaamuvara muteko ni miyo? Kahi n’ile miyo enaamini aka, awo khanaamini. Khino ophwanya emosa imara kamosa kamosa. Nyuwo munuupuwela wira aMetotista yaamuvara? Mweererye, nto moone. Mukhale atimministratore aka esumana emosa. Nyuwo mwavolowa, munrowa ovolowa mwa Nsina na Yesu. Eyo ekeekhaii.

¹²⁵ Oh, vekeekhai, awo animookelihani mme, vekeekhai, anoookelihani mme vatthu vo nipuro nlo, ni siiso wira nyuwo muhikhale oopatthana ni yaawo mwa khula enamuna siiso. Vano nto nyuwo mwakhuma, aniira, “Oh, vano, Munna Branham ori ntoko, niireke ookhuma mmuupuweloni vakhani paahi, nyuwo moosuwela. Owo . . .”

¹²⁶ Vakhala wira miyo kookhuma mmuupuweloni, weso Bibilia ori ota wa Mwiixuttiho. Eyo t’ile Bibilia ohimmy’awe! Ayo, mulopwana. Nwehe!

¹²⁷ Yesu ohimnye wira, “Mwaha wa xeni okiihanaka Miyo ‘Pelizepuli’? Nyuwo mwaahimwaamini Salomoni, ethoonyeryo awe y’othokererya. Nyuwo mwaahaamini nihiku nawe. Piyamwene Ookuusini aakhumme mapuro a wookiserani w’elapo, wira oone yoovah’ele, ni owo aahaamini okathi woonaly’awe. Ni nyuwo munookilaathi ni wona yeeyo khula nihiku, vano khamunaamini.”

¹²⁸ Ni axinn’Awe Ene khayaamwaamini Uwo. Awo yiirale, “Murowe mpakha oniirani,” Owo khwira, “masi Miyo nkinrowa naanaano.” Owo aaronwe ephiro ekina, okhala wira axiin’Awe Ene khayaamwaamini Uwo. Eyo ekeekhaii. “Mukhora ti woophunyeya, ni ephiro ti yoorika, vano ale amphwanya eyo ari vakhani.”

¹²⁹ Okathi ephiyenry’aya w’arummwa, wa wooniheriwa wookiserya, awo yaari vai? Muthiyana mmosa ni mulopwana

mmosa ti yaattamenle mwiikimanyo ni Yoowo, Yohani ni Maria. Akina a awo yaahrirowasa.

¹³⁰ Ela ti eyooniheryo yookiserya. Ola p'ukathi. Ti vaava okathi Muluku oniir'awe itthu. Ti vaava okathi Mesiya ory'awe mulaponi. Ti vaava okathi Owerya wa Muluku oneett'aya eriyari y'atthu Awe. Nto awo aniwiihana "masantu oophirikeya, alolo, oovahuwa," oh, itthu ntoko seiyo. Masi okathi ori va!

¹³¹ Vekeekhai onoorowa okhala ovirikanyiwa wuulupale woolamuliwani.

¹³² Oh, mulipa oopaka eviinyu wiiphiini, owo onnisuwela vatthu onrow'awe okhala woolamuliwani. Siiso tho nammuwurya saravexa onnisuwela vatthu onrow'awe okhala. Siiso tho muthiyana namuttompe onnisuwela vanrow'awe okhala-vo. Siiso tho nacuuku onnisuwela vanrow'awe okhala-vo. Siiso tho namuhapaliwa onnisuwela vanrow'awe okhala-vo. Owo khanrowa okhala oovirikanyiwa.

¹³³ Masi vatthu vanrowa okhala mulipa-oovirikanyiwa, t'ale yuupuwela wira yaari sana. Ti vaavo vari ovirikanyiwa. "Okathi awo waawenly'aya iwe, yiirale, 'Vekeekhai, hiyo naaniwoomola axetwani mwa Nsina Nanyu. Hiyo n'alaleyii. Hiyo nniira mpantta wa ikereja khata khata. Hiyo noopaka miiriirya suulupale. Oh, hiyo noolaleerya! Vano, miyo kaari a—miyo kaari atimministratore mukereja. Miyo kaari pixipu. Miyoo kaari *ila.*' Mukhume wa Miyo, nyuwo muniira sootakhala, Miyo hata nkinatoko woosuwelani." Eyo eri vo. Owo p'uvirikanyiwa. Owo ohimmye wira, "Aana a an'aya anoovolowa ekilaathi mOmweneni, yiire, 'Hiyo nookhalana ehakhi yookhala mu,' nto awo animoomoleliwa ota mw'epiphini, weiwo onrowa okhala wunla okhupanya n'ulumanyiha maino." "Mukhora ti woophunyeya, ephiro ti yoorika, enroiha mw'Ekumini, ale amphwnya eyo ari vakhani."

¹³⁴ Wa nyuwo, atthu aka oophenteya, voosiis'ula, nwiriyane ela. Miyo nkinatoko opuni ila. Miyo kinimwaakhula mwaha w'ohimya Eyo. Eyo ti yothene miyo erin'aka waakhula. Kaahilaleerye-tho ehapari ekina mwa makhalelo aka, eyo Ekeekhaii: anrowa okhala atthu vakhani paahi anrowa woopowa. Muupuwele yeeyo paahi: vakhani paahi. Nyuwo mukhale mmosa a yaawo.

¹³⁵ "T'avi awo, Munna Branham?" Miyo nkisuwenle. Khaavo tho mutthu mukina onsuwela. Hiyo ninlipiherya woopowa wahu ni nttittimiho ni woova.

¹³⁶ Masi nyuwo mukhale oratteene ni Muluku. Murima anyu waatthimakeke voolikana ni Bibilia owo, weso yookhala etthu evonyeiye, yookhala etthu evonyeiye. Hata wira ekerej'anyu enihimya exeni, khivanweryaneya ovolowa ni yeeyo. Nyuwo muhaana ovolowa ni ele Muluku ohimmy'awe. Ela ti Eliivuru enrow'anyu olamuliwa-no, Bibilia. Mukhale ni Yoowo!

137 “Oh,” nyuwo muniira, “ahe, miyo kipatisiwe ni Nsina n’Apwiya Yesu.” Eyo ti yoolikana, owo Bibiliaa. Masi makhalelo awo yaahimutthareke, khamuphwanyenrye etthu opatisiwa.

138 Nyuwo muniira, “Ahe, miyo kahaakhela Eroho Yowarya.” Eyo ti yooreera, ti yeeyo yaatthuneya nyuwo wira mwiinreene. Masi makhalelo ene yaahikhale vo!

139 Muupuwele, nthakathaka ninnaakhela owerya omosaru ommorela etriku wira yinnuwihe, enniiriha nthakathaka okhuwela, nave. Nthakathaka naamukhaani nnoovenya ni ti nootteeliwa murima ntoko etriku ery’aya. Eyo ekeekhaii, enkhala n’ikumi emosaru. Ni natampi onniwerya okhala Ohoolo wa Muluku, okhuwela oxintta, ni okhala ntoko muKristu. Masi yaahikhale-ru etthu yoovirikana mmurimani! Owo aamuwerya okhalana Owerya omosaru wo woomola irooho sootakhala. Yesu ohimmye siiso. Owo onoowerya olaleerya Ehapari yooreera vooreerexa ntoko mulaleyi mukina sinwery’awe wira. Eyo vekeekhai t’ile, Yesu ohimmy’awe. Bibilia onniixuttiha eyo. Ayo, mulopwana. “Hata kaamulavula ilavulelo s’atthu ni malaikha, hata kivahereryaka erutthu aka wira epahiwe ntoko mukuttho, ovaha mihakhu saka sothene wira elyihive alipa-oohaawa, miyo—miyo kaakhalana waamini onwerya olovola miyaako, wira itthu iya sothene, olaleya mwa Nsina Nawe, owoomola axetwani mwa Nsina Nawe,” owo ohimmye wira, “Nkihiyo etthu.” Tivo, owo aamuwerya wira, nave “hat’etthu.” Munniiwa muupuwelo ene?

140 Vano, etthu yo wira t’ila, mmurimani mwanyu, mukhale muKristu, vano nvolowe mukhora woophunyeya. Maana, ephiro yoowookowa t’ile enroiha moorimeelani, alipa-oowaamini imilyawu imara imilyawu sene mwa nloko nla anrowa ovolowa nipuro nenlo. Okhala wira, mukhora ti woophunyeya, ni ephiro ti yoorika, nyuwo paahi ni Kristu meekh’awe.

141 “Ephiro enroiha mw’Ekumini ti yoorika, vano ale amphwanya eyo ari vakhani.” Vano, Awo ti Masu a Pwiy’ahu. Wulu! Owo iira exeni? Eemenleene vale, athokoreryaka soowuupuwela saya.

142 Nto owo khwira, “Owo ti Pelizepuli. Ahe, onwerya sai Owo okhala Muluku? Owo Mutthuu! Osuwela nno onikhuma wowi?” awo yaahimya mmuttettheni mwAwe Yoowo.

143 Nyuwo mwaakelaka mmuttettheni mu, enikhala ntoko. . . Miyo nkinihimya ela wira kihoottittimiheni nyuwo atthu; nyuwo mwa aKristu, nyuwo munnikiphenta. Nyuwo munikela mmuttettheni mu, nto enikhala ntoko owerya wa Satana onimoomanani. Nipuro nla ti noolamuliwa ohukhummwa. Muttetthe ola ti woolamuliwa ohukhummwa.

144 Exeni aahimmye Billy Graham okathi okenly’awe oLouisville? Owo aahimmye wira nle ti “nipuro nootepexa okhala-vo owerya wa xetwani” owo aatonko awe woona

mwa makhalelo awe. Khuhela muxornaaleni, khwira, “Vanniweryaneya nyuwo woona ohaaxa wa xetwani.”

145 Vekeekhai, miyo kaamoona. Mwaha wa xeni? Ela elapo aka yoomi. Okathi Yesu waahokolowenly’awe muttetthe Awe, Owo aahimye wira miteko sinci-ene s’owerya Owo khaawerya ovara, mwaha wo ohaamini waya. Khwira, “Profeta kahi oohittittimihiwa, mulaleyi, woohikhala wira ti wawawe—mulaponi mwawe, eriyari y’atthu awe.” Munnona? Khivanweryaneya nyuwo okhoottiha eyo, Yoolempwa enihimya siiso. Munnona?

146 Vano, nyuwo mwaakelaka mmuttettheni va! Ni muhikileele wira nkaarowa osuwela. Miyo kinniwaattama atthu ankivaha mukhono ni wira, “Oh, Munna Branham, miyo kinnoophentani.” Nave nyuwo moosuwela wira iwo woothaa! Nyuwo moosuwela wira iwo wootha. Vakhala wira Muluku onniwerya okileela othokorerya wa mmurimani, Owo khanwerya okileela eyo?

147 Vekeekhai, nto murowe eriyari ene y’atthu anyu mmuttettheni! Okathi awo aniwoonaayani, aniira, “Ahe, nyuwo moosuwela, miyo kihoona vatthu lexe ni lexe. . .”

“Woowi? Waari woowi?”

“Mwaawelaka iwe. . .”

“Huh! Hiyo ninnimusuwela mmirav’ole!”

148 Nyuwo munnoona eyo. Mukihiye kooleleni, mmuhiye mutthu orwe owannyinyu ohinsiveliwa vanci-ene ni nyuwo, akilaathi owannyinyu okathi vakhani paahi onimooneya moonelo ole woohiloka. Muncererye yeeyo imara ikonto muloko na xexe vano, nto munoosuwela enihimyaka. Nto nvolowe nipuro athu othene anoophent’ayani, moonelo ole woosivela, paahi, oh, wulu, ni nyuwo mwaamuwerya okhala vaavo mahiku othene, moone. Ti yeeyo, moone, eyo eroohoo. Ni atthu khansuwela exeni iyo, awo anooxanka mwaha wa xeni atthu ary’aya oopahuwa.

149 Exeni eniwiiriha athiyana ooreera murima, exeni eniwiiriha athiyana ooreera murima owara ikuwo iyo soohifayi n’urowasa iwo? Exeni eniwiiriha, hata vano nlelo onriiry’aya, axiruusi a miyakha muloko ni mithanu namosa, owara ikuwo sahaatthuneya owara ohoolo w’amey’awe, ni ota iwe mphironi? Okhala wira, kahi mwaana owo (mwaan’owo khonsuwela wira khivanthuneya wira), masi okhala wira mulaleyi vapulpitu onoovonya okhala ooromeleya v’opuroni wa muteko awe. Eyo vekeekhai ekhweelii. Vekeekhai. Athiyana aneettasa mphironi, ni othene yiiwarinheene v’enamuttompe n’itthu ntoko seiyo, vano anatampi animwaaweha ni khansuwela wira owo vekeekhai t’ottheka pahi ntoko wira oorupa ni mulopwan’owo. Yesu ohimye siiso! Yesu ohimye wira, “Ole onimuweha muthiyana amuwereihaka murima, oomala oraruwana vamurimani wawe, vano owo onoorowa waakhula mwaha wa

yeeyo nihiku no olamuliwa.” Mukhora ti woophunyeya, ni ephiro ti yoorika!

¹⁵⁰ Miyo koosuwela wira nyuwo munoona wira ka mutthu oolipa murima. Nkihiyo oolipa murima! Miyo ka munn’inyu, ni kinnoophentani.

¹⁵¹ Mutthyawe oviruwa onihalela orwa! Murowe vamwiikimanyo mwavekele mpakha murim’anyu okhale woosareya Eroho Awe, eyo enimoorerihani ettuli ithu sothene sa molumwenkuni, ni weetta vooreera murima ohoolo Wawe, ni murim’anyu ovihiwaka mwaha wa Yoowo. Ophenta! Kahi okhanyereriwa. Kristu kahiyo okhanyereriwa, omurumeela Kristu, ti ophenta onimurumeela Kristu. Eyo enimoottittani, enimoothipelelani, mpakha esimu yothene ya makhalelo anyu omana ni Yoowo. Owo p’ukathi munoon’anyu etampi.

¹⁵² Vano Owo aahinla mwaha w’elapo. Eyo yahimuriipiha murima Muluku mahiku a Nowe, okathi Owo woonaly’awe mirima. Ni Yesu aahikilaathi vasulu vamwaako, khwira, “Yerusalemu, Yerusalemu, imara kavi Miyo kitthunne aka woohupaarani ni mapupha, masi okathi anyu woophiya nave ethhoko anyu enihiiwa yooahaawa.”

¹⁵³ Siiso tho enookhala Orwa wa Mwana a Muluku, mirima s’atthu-oowaamini eekeekhai ti soowiiniwa. Owo onnoona naanaano va wira waahaana okhala muhakalaliho ovalaka elapo ela. Vanweryaneya sai okhala muhina mwa nikhuru n’atthu oohitthara ikano? Vanweryaneya sai okhala, awo aryeene oolamuliwa ohukhummwa opacerya wene?

¹⁵⁴ Omwene wa Muluku onlikana ni mutthu aarihenle ntthavi mphareya, nto, okathi opurunly’awe, owo aahikhalana ihasa, aropweropwe, inowa, anaphulu, ni ihopa vakhani. Khaari owo aahimya wira ekhale evi, owo aaroorihelela paahi okerekhere w’ephareya. Ti yeeyo eniir’aya Ehapari yooreera. Ti yeeyo Billy Graham, Oral Roberts, yoomi, ni alaleyi othene akina anlaleya Ehapari yooreera, anooriha, n’upurula, “Iye siri vale, Pwiya.” Masi exeni hiyo enniir’ahu khula okathi? Hiyo nimphwanya wira, nyuwo muhinatthi otthikela tho, naanaanoru awo ari vantthiyani tho. Exeni iyo? Opacerya wene, eyo yaari ehasaa. Eyo khemurukunxale, ovariwa ni ntthavi na Ehapari yooreera. Eyo yaari ehasa opacerya wene. Owo aari ropweropwe opacerya wene. Eyo yaari enowa opacerya wene. Owo aari namirima milli ohinatthi hata ovolowa mukereja. Owo khaarina hata otthuna w’ohiya owurya wawe ni cuuku, ni ompaha sona ni wootha, ni wiia. Owo aarwenle paahi mwaha wo wira aamoova omooroni. Nyuwo munootepa wiikhaliha oophavela yeeyo, mwaiiraka-ru siiso. Eyo ekeekhaii. “Mukhora ti woophunyeya, ni ephiro ti yoorika, vano ale amphwanya eyo ari vakhani.”

Nivekele.

155 Pwiya, oh, mukithokose, Pwiya. Mphuke mwaha aka naanaano va, Pwiya. Muhikihiye okhala oorwa woolamuliwani ohoolo Wanyu, numala olaleya siisa. Oh, yakhala etthu p'itthu yootakhala mwa miyo, Pwiya, mukumihe, xontte! Hiyo ninnoona nihiku ninkhal'ahu, okathi alopwana n'athiyana ankhal'aya oothipelelaxa. Awo annuuliwa muru. Nyuwo mwaahihimya emara emosa, "Khekhanle hata ehaaya eriyari y'aana axithiyana ooSiyoni." Wisumaaliha waya wookumihiwa mpakha awo hata ahinkhal'aya ooxeerya tho. O Pwiya, wuupuwela yeeyo! Ni osuwela wira eroroco ohoolo enimweetta voohihyererya, minutu mmosa paahi wala miili, nto ohononiwa wuulupale onimoorwa, vano ole ootakhala akhaleke ootakhala nlelo.

156 Muluku, munivenxe hiyo othene voosiis'ula. Munitathe, Pwiya! Hiyo ninnoona ikhanyeryo sirwaaka. Hiyo nookhalana maitho ahu ootthukuwa wira nisuwele yeeyo. Hiyo ninniwoona atthu imilyawu, imilyawu sene, Pwiya, arenrye ettuli aya enaarowa. Miyo kinniikoha, kiireke exeni, kiireke exeni, O Pwiya? Yookhala etthu, Pwiya? Vakhala wira ela entthuneya-tho olaleerya, ovekela-tho, etthu ekina tho, mukikhaliherye, Pwiya, wira kiwerye waaruuwela Mutthaka atthu. Kiireke exeni? Masi awo anookhootta Owo voohihyererya. Nyuwo munnipaka ithoonyeryo Sanyu suulupale ni munnipaka mitikiniho, nave nlelo atthu animweetta erowaka. Ti yeeyo Yoolempwa Anyu erin'aya omaliheriwa, ola p'ukathi wira "Khaavo onwerya orwa wa Miyo ehikhanle wira Atithi Aka anoomuruuha, ni othene ale Atithi akivanh'aya animoorwa wa Miyo"? Pwiya Muluku, munivahe voosiis'ula wira atthu evenye ni yoone ekhanyeryo ela yookiserya ya mulaponi. Miyo kinnivekela, Muluku, wira Nyuwo mwaavahe etthu atthu.

157 Mwaareerihe atthu ala vakhani va voosiis'ula. Muluku, opacerya Munna Neville, Pwiya. Nvonihe erutthu awe. Owo onoowereiwa voosiis'ula, Pwiya, owereiwa mmirimani. Miyo kinvekela wira ntata Nanyu noovoniha nikhale mwa yoowo. Muhakalalihe munep'awe.

158 Muluku, murowe eriyari ya muthukuman'ola. Aakhala alopwana n'athiyana akilanthi va kikhanly'aka oohiwoonaka-tho mpakha nihiku nle n'olamuliwa, vano miyo kihaana waakhula. Masi koosoma Masu Anyu, "Mukhora ti woophunyeya, ni ephiro ti yoorika, vano ale amphwanya eyo ari vakhani." O Pwiya, mwaahiye ala ekhale yaawo "vakhani," akina a awo, munimwiira, Pwiya? Mmuvahe yeeyo khula mutthu va.

159 Miyo kinvekela ntoko mutthu aarow'awe owerya ovekela paahi. Pwiya, atthu ala yaamukiirela khula etthu miyo, enihimya okikhaliherya. Kaavoliwe etala, awo yaamukivaha yolya. Kaatthunne efaato, awo yaamuthuma. Yaamurowa vamosa ekithumele ekaaro, wira kilaleerye Ehapari yooreera. Awo yaamwiira etthu p'itthu siiso. O Tithi, muthokose minepa

saya voosiis'ula, xontte mwiire, ni mwaahiye ethokose owo ohoolo Wanyu. Miyo nkisuwenle, kinrromela wira khula mmosa a awo ori mwa yaawo Oothanliwa. Ni mukihele memmo, nave, Pwiya. Nto naakhanleene nthowa mwa miyo nahaarowel'aka okhala memmo, Pwiya, Nyuwo mukuupululele paahi, miyo kinoolakiherya naanaano va. Miyo kintthuna kikupali, Pwiya, wira voosiis'ule khonrowa okhala hata mukattiyamiho omuratthini. Miyo kintthuna kivolowe nihiku nle. Ni nkisuwenle okathi xeni onrow'aya okhala owo, khino siiso nlelo okhanleene olelo. Tivo, mukikhaliherye wira kisuwele, mwaakhaliherye atthu ala wira esuwele.

¹⁶⁰ Vano hiyo noonaka mirima sahu sinikhala soohicaliwa! Oh, hiyo onnisisivela wiiwa Mutthaka wooreera muraatiyuni, wala orowa okereja. Hiyo ninnisiveliwa ni Mutthaka wooreera. Hiyo khennihaaxa omuromola Yesu nipuro nlo. Masi, Pwiya, etampi yookhala muritti wa hiyo, ni enruuha maithori mmaithoni mwahu, ninyakulelaka nikhuwelaka ni nikhalaka oopwapwela yeeyo, itthu sothene, sootakhala siniiriwa mmuttettheni? Pwiya, muhiye Nlaikha na Muluku noone eyo mwa hiyo, ni munitthitte. Munivahe, Pwiya.

¹⁶¹ Vano murwe, Pwiya Yesu, naanaano ni mulikanyihe mirima sahu, ni munivahe ikhanyeryo Sanyu s'eekeekhai wira Nyuwo muri eriyari ahu, wira hiyo niwerye osuwela wira ninaakhela—ninaakhela ekhanyeryo yookiserya nihinatthi omala nloko nla.

¹⁶² Vano hiyo ninnoona oraruiwa, okathi atthu ankhala mulaponi ni ekhalanaka aana ooyariwa n'awar'aya axilopwana akina, ni—ni aximwali axikhaani mphironi, ni imiya sene etthyawasaka oxikola khula mwakha ni axiruusi ekhalaka aximaama, ni khokhanle nttittimiho, ni moota athiyana yiihapalihaka, mmansaya, mwaha w'omupaha sona ni—ni ewuryaka, ni itelevisawu ni sikina sinhonona miyuupuwelo s'anamwane. O Pwiya, enookhala mpakha silini? Ni Nyuwo, Muluku Oowaarya!

¹⁶³ O Tithi, miyo—miyo vootikiniha—vo kinnoona olelo wira ehaana wiiriwa etthu vooihlekela, Pwiya. Miyo nkinsuwela etthu y'ohimya, masi kinvekela, Pwiya, wira Nyuwo muhele mmirimani mwahu etthu yo wira. Munivahe itthu iya, Pwiya. Hiyo ninvekela mwa Nsina na Yesu. Amen.

¹⁶⁴ Okathi ori vakhiviru. Khula mutthu aankhili ontthokelela, onnisuwela wira yookhala etthu ehanle okhumelela. Khokhanle mutthu mpaani mu, ori n'ankhili awe ooloka, ohinsuwela wira olumwenku ula khivanweryaneya okhala ni mikhalelo iya.

Hiyo khaninwerya ovilela, apatthani. Khekhanle hat'etthu emosa, ntoko pastore anyu munn'inyu, khekhanle hat'etthu emosa ekhanly'aka ooweettiheryani—wo voosiis'ula woohikhala Yesu Kristu. Khiyaavo etthu ensuwel'aka. Muupuwele paahi

itthu sihimmwe wira siiraneye Okuxiwa ohinatthi wiiraneya, itthu sothene sinsuwel'aka soomaliheriwa.

¹⁶⁵ Nyuwo muniira, "Ankhi ekhanyeryo ya nxeni?" Eyo eri wira erwe Moohaawani. Ekereja eniira eronweene nto. Khenrowa waatthitta ala, ala aarowa, moone. Otthittiwa oniiraneya vano. Otthittiwa olopoliwa, maarakha. Mutthyawele wa Muluku, mutthyawele wa Yoowo vowaakuva!

¹⁶⁶ Miyo kinniikoha voosiis'ula, okathi onweherery'ahu va minutu mmosa paahi. Ni miyo kinoona ntoko nyuwo. Miyo—miyo kinniwerya woona enoon'anyu, khula mmosa a nyuwo eereryaka wuupuwela, "O Muluku, mukithokose!" Eyo ti moota sinoon'aka, nave. Miyo kinnisuwela wira Mitthaka iya siiso, mpatthani, kahi soowaakheliwa eriyari y'atthu. Nyuwo munoowuulumela ni nyuwo munoo- . . .nyuwo—nyuwo munimwaayeviha paahi. Ohaana okhala mutthu oniira yeeyo. Miyo kaanithuna khino okhanleene mutthu mukina. Masi yamorela mpantte aka wira kiire, vakhala wira kihaana okhala mulipa—ookukuttha, mukihye kikukutthe. Vakhala wira ka . . . David ohimnye wira, "Kaamuthanla okhala karumeya Mpaani mwa Muluku, ohikhanle okhala muheemani ni etampi." Eyo ekeekhai. Etthu p'itthu Muluku onthun'awe wira nyuwo mwiire, mwiire. Muhuuliwe muru. Yakhala . . .

¹⁶⁷ Nto, muupuwele, miyo koosuwela wira etthu yuulupale. Wira, "Munna Branham, nyuwo muniira wira athanu n'araru ti yaarowa woopowa?"

¹⁶⁸ Miyo nkisuwenle akavi anrowa woopowa, nkaakhanle oowerya wooleelani. Masi miyo kinihimya etthu emosa: awo anrowa okhala vakhaanixa, mwa nihiku ntoko nla. Muupuwele paahi, nihiku nle Owo aary'awe, akavi yooponwe. Muupuwele nihiku na Nowe, ni nihiku na Lothi—Lothi, ni othene aya, Owo ohimnye wira, "Siiso tho enookhala orwa wa Mwana a mutthu, 'okhala wira, mukhora ti woophunyeya, ni ephiro ti yoorika." Moone, nyuwo munvolowa mmansinyu, ni Yoowo, nto eyo ti yothehe. Munnona? "Vano ale amphwanya eyo ari vakhani." Akavi anaamini wira eyo Ekeekhai ya Ehapari yoorera? Yesu Kristu ohimnye siiso, "Ale amphwanya eyo ari vakhani." Vakhaanixa paahi. Mukhale mmosa a yaawo vakhani. Miyo koosuwela wira ti yoolipa, ti ya ikuru. Ni eyo ennikitittha wira kihimye, okhalanaka ophenta wa mutthu mwaha wa nyuwo, masi ophenta wa Muluku onnikikhanyererya wooleelani.

¹⁶⁹ Vano, Eroho Yowarya emosaru yaavanre muteko mahiku a Abrahamu, yaavanre muteko mahiku a Kristu, yaahihimya okhala va wira etthu emosaru. Eyo eri vaava. Vano, vakhala wira kinooleelani Ekeekhai, Muluku ohaana wira Ekeekhai yeeyo.

¹⁷⁰ Kaahisukeke nuulumo naka, nkihiyo mutthu a nuulumo naka. Nyuwo mwaahisukeke nuulumo nanyu, khamuhiyo mutthu a nuulumo nanyu. Vano, kaamuwerya woolaiheryani

etthu nave khuhiwerya wira, masi—masi kinimoorwa kooleleni. Vakhala wira munookilokiha etthu, vano kinawiiipithani, ka namirima miili. Karwa wooleelani wira, “Munnikilokiha, masi nkinwerya woolivani, masi kinimwiilipiha vanwery’aka,” vano nyuwo mukilevelele ni mukikhaliherye. Munnona?

¹⁷¹ Hiyo othene ninnilokihiwa ni Muluku etthu. Owo onniniilokiha ikumi sahu. Nrowe nikhale a xariya mwa yeeyo. Mukhume mwiire...Muhiire, “Ahe, vano nkawehani, miyo ka—miyo ka muPrespiteriyano. Miya ka mMetotista. Miyo ka muPentekosite. Miyo ka Ekereja ya Muluku. Miya ka muNasareno. Miyo ka Nawetta a Mowaaryani.” Muhuupuweleke yeeyo! Anoorowa okhala atthu imilyawu sene a yawo omooroni. Mukhale muKristu, mwa Kristu.

¹⁷² Akavi anrowa wira, “Munna Branham, mukuupuwele mmavekeloni vano, kintthuna kivenye”? Muluku ooreeriheni.

¹⁷³ Pwiya, Nyuwo munnoona matata aya. Okathi ori vaava, Eroho Yowarya yuulupale yoomaaliha emp’ela voosis’ula. Miyo kinnoona Mukhalelo Anyu. Kinnisuwela wira Nyuwo muri vaava wira muttittimihe Masu Anyu, “Miyo Apwiya kihaala, ni kinoonaaniha othana n’uhiyu, wira ohikhale mutthu onikumiha mmatatani Mwaka.” Nyuwo mooveleela Masu Anyu wira mmaliherye enthun’anyu, ni Awo a—Awo ahaana wira yeeyo, Pwiya. Yoolempwa enihimya wira Nyuwo mwa mmosaru nsana, olelo, ni mahiku othene.

¹⁷⁴ Awo khayaawerya waamini, atthu ale a mahiku Anyu khayaawerya waamini wira Eroho Yowarya yaari mwa Nyuwo. Nto Nyuwo mwaahiikhaliha Mmansinyu (muryeene Mutthu) Muluku, yoowo, Nyuwo mwaary’anyu Mwana a Muluku ooyariwa ni harusi aarwiye mulaponi wira onivuluxe mwa itampi sahu. Ni okhala wira awo yaahoono Eroho ya Muluku mwa Nyuwo, awo yaaheererya okhaliha yoovirikana. Vano Nyuwo mwaahaaleela, Pwiya, “Nkihiyo Miyo kinvara miteko, t’Atithi Aka ankhala mwa Miyo. Awo t’anvara miteko. Nyuwo munimwiihana Abrahamu ‘tith’inyu.’ Abrahamu aahoono nihiku Naka.” Vekeekhai, owo aahoono, okathi owo waary’awe eemenleene vakhiviru ni Yoowo, aahimoono Owo ovara miteko iye ni ekhanyeryo. “Owo aahoono nihiku Naka khutthapa.” Khwira, “Nyuwo munoovonya, ohisuwelaka Yoolempwa hata Owerya wa Muluku, moota Muluku aarow’awe owerya omukhuneela ni eruku harusi, khimuyara Mwana (ni eyareliwo ni harusi) ni okhala Mmansawe mwa omalela wa Owerya Wawe, mwa Mutthu yoole.”

¹⁷⁵ Ni moota Owo aawery’awe okuxa Ephome eene yeele mw’Erutthu yeele Owo aavanh’awe ntoko Mukuttho, ni waareerihani atthu Yoowo mwaneene aarow’awe okhala mwa yaawo, otthikela muteko Awe mpakha ophiya woomaleloni! O Muluku, mwaavenxe atthu wira yoone eyo. Munivahe.

Mmoopole khula mutthu ovanxale ntata nawe. Mureerihe mirima saya. Pwiya, matata aka ari osulu. Mukireerihe, O Pwiya. Ela empa yootharuxiwa-mo. Nla nipuro naatthuney'ahu orapihiwa. Muhiye Eroho Yowarya enirapihe voosis'ula, ni munikukutthe soonanara.

¹⁷⁶ Hiyo ninnivekela, Pwiya, ohikhale hata mutthu onikhuma va ohikhanle oosareya Eroho Anyu. Alakela khonrowa okhala hata wuukhuwa w'ota okathi enrow'aya wiiraneya. Masi, Pwiya, murowe epannte ya muhina, mukumihe nikatamphe ni munoonihe ele hiyo nikhanly'ahu, Pwiya. Munivahe. Vano nto munisarihe ni Eroho Anyu, ni murima ori w'eeekhai ni wooreera. Ni mwa okathi ula w'olupatthiwa ni weereriwa woolipa, Nyuwo munookhala ooreerexa murima ni oosivelexa wa hiyo okathi onrow'ahu ohoolo, niwehereryaka nihiku nlo. Okathi maithori ankhuruw'aya emoraka wiitho wahu, mwaha wa itampi sa mmuttettheni, Eroho Yowarya ewehe vathi yiire, "Ookhanla mmosa onwery'aka omutthitta, mulopwan'ole t'Awaka, muthiyan'ole t'Awaka." Munivahe, Pwiya. Wira eyo ephwanyaneye eriyari ahu olelo. Hiyo ninvekela mwa Nsina na Yesu. Amen.

Okathi onrw'aka omuratthini woomaleloni wa
nihiku,
Nto ittheku sookiserya sa oxanka simanleene
oruma;
Onookhala Mutthu alipelelaka yoowo onrowa
okooniha ephiro,
Nkinrowa okhala oomulapuwa Yordani
meekh'aka.
Nkinrowa okhala oomulapuwa Yordani
meekh'aka,
Yesu okhwiye wira attipihe itampi saka
sothene;
Koonaru epiphi, Owo onoorowa okiwehererya,
Nkinrowa okhala oomulapuwa Yordani
meekh'aka.

¹⁷⁷ Miyo kinthuna kimusuwele Yoowo vano. Muvare ntata naka, Pwiya ooreerexa, mukeettiherye ohoolo, mukihye kilipe. Mukihye kilipe nno, Pwiya, kikhootaka itthu sothene sinihaniwa soonanara, itthu sothene sinikhala ntoko soonanara. Khenikicali etthu mutthu mukina onihimy'awe, mukihye kilipe, Pwiya. Kamalaru wira sothene sinwery'aka wira, mukikhaliherye olipa. Muvare ntata naka mukiroihe ni nenlo, Pwiya. Mwiire etthu, mukihye kilipe. Itthu iye sarwa vale, ni mihakhu s'olumwenku ula ni nttotopelo aya wothene ni ovuwa waya; mukhuneele maitho aka wa yeeyo, mukihye kimoone paahi Ole okikhwenle miyo. Yakhala wira entthuneya khula mpatthani orin'aka, yakhala wira sinthuneya itthu sothene sirin'aka; eyo khenihimya etthu, miyo kinvahererya yothene eyo

waltari. Ti yeeyo, mukihye kikhale ooroomeleya. Nto nihiku nno iphumu sinrow'aya wunseelelaka wiitho waka, nto kisuwela wira murim'aka woorowa ni mahiku aka yamalaru, ni okathi aka wamalaru ni epaphelo aka yakumihiwa-ru mmurupani, miyo nkinthuna omulapuwa Yordani meekh'aka. Owo onookhala weiwo. Ayo. Koonaru epiphi, Owo onoorowa okiwehererya iwe, nkinrowa okhala oomulapuwa Yordani meekh'aka. Miyo kamweemererya Owo vano, Owo onookeemererya miyo nto. Miyo kinoomukhalela Yoowo okikhwenle miyo, moota makhalelo aka anrow'aya okhala ootteeliwa murima nto. Eyo t'inamuna entthun'aka okhala.

¹⁷⁸ Miyo kinoona wira aakhala atthu anwereiwa mu. Owo ookawa ittikitti? Miyo kaahiliyala. Awo aakawasa ittikitti? Yookhala ettikitti ekaiwe? Ookhala orina ettikitti ya mavekelo? Nnari.

¹⁷⁹ Miyo kinlipelela Eroho Yowarya paahi. Nyuwo mwaaminiru paahi, mwaamini paahi, muhihoverye. Muluku akuupululela vale miyo mixankiho sanyu. . . Enakhaleru etthu p'itthu, miyo nkisuwenle; mwavenxaru ntata nanyu, nyuwo khamunkisuwela ni miyo nkinoosuwelani. Vano vakhala wira Muluku onimuupulula va, mwaamwaamini wira naarowa okhala Nlaikha nimosaru naaruhale Mutthaka okathi vakhani ohononiwa ohinatthi wiiraneya ottuli wu, naamukhala Nlaikha nimosaru nenlo naaruuha naanaano va ohinatthi okhala ohononiwa okina. Mwaamwaamini yeeyo? Vakhala wira mwaamwaamini, muvenxe ntata nanyu. Vaareera. Vaareera, Apwiya enivahe.

¹⁸⁰ Owo okilanthi vakhiviru ni miyo. Ookhala mukina okilanthi vakhiviru ni miyo, ti Muhano Snyder va, kiireke Muhano Murphy va, nikhanye nsina nawe, okilanthi vaava va. Miyo kinnaasuwelasa.

¹⁸¹ Miyo nkimmusuwela mulopwan'ola, owo muletto wa miyo. Masi Muluku onnimusuwela. Vakhala wira Muluku onimuupulula eyo vano, akavi a nyuwo ansuwela wira kehiyo. . .

¹⁸² Muhikiweheke miyo. Wulu, miyo ka mutthu a mmwaakoni oKentucky, vari ile enihimya yeeyo. Miyo—miyo hata nkisomme voophiyera, yoophiyaka, wira—wira kilepe nsina naka. Masi yookhala etthu emosa miyo ensuwel'aka, miyo kinnimusuwela Owo. Vano eyo, eyo ti—eyo ti yothene enikicali osuwela. Vano, muhi—muhixikhe ele ekhanle elavulelo aka.

¹⁸³ Ni nyuwo siiso muupuwelaka wira olaleerya waka voosiis'ula waari wothene woorkhuma mphironi ni sothene, mulikanyihe ni Bibilia emara emosa nto moone vakhala wira vekeekhai khenlukama eriyari. Moone sinto elupelo anyu khekhanle eriyari okathi nyuwo—nyuwo onrukunxel'anyu vaavo. Muhilikanyihe ni miyuupuwelo sanyu yeenyu, masi mulikanyihe n'itthu Owo ohimmy'awe. "Mukhora

ti woophunyeya, ephiro ti yoorika, vano ale amphwanya ari vakhani; 'okhala wira ephiro yoowookowa t'enroiha moorimeelani, ni mukhora aya ti muulupale, vano anci-ene anoorowa ovolowa yoowo," atthu imilyawu imara imilyawu sene anrowa ovolowa memmo. Mmosa muhina wa emilyawu khino enrowa okhala moota enr'aya. Eyo eri vo. Eyo t'ile Owo ohimmy'awe. Vano, Owo khonahimyeke nummaru nno, masi Owo ohimye wira, "Ntoko saary'aya mahiku a Nowe, atthu athanu n'araru. Ntoko saary'aya mahiku a oSotoma, araru." Mwa othene, araru ti yooponwe, mooro. Siiso enookhala!

¹⁸⁴ Vano, mutthu akhala a erooho vekeekhai, miyo kintthuna wira mmuwehe mulopwan'ola okilanthi va, owo onookiweha paahi voohihiyererya ntoko sinwery'awe. Oroovenxa ntata nawe, miyo nkimmusuwela; nkinatoko omoona, ni nkinsuwela hat'etthu ya yoowo. Owo okilanthi vale paahi okiwehaka. Masi, moone, owo onookwannya, owo onoovekela. Vano, eyo ekeekhaii. Vano, vakhala wira Apwiya anookileela... Mulopwan'ole okilanthi vookirakamela miyo, ni nno t'okumana wahu woopacerya, ni owo ori vale okilantheene. Vakhala wira Apwiya anookuupululela miyo etthu owo—etthu owo... miyo—miyo nkaakhanle oowerya onvonihia. Nkinwerya, nkaakhanle oowerya wira eyo, 'okhala wira Muluku ohiira eyo. Masi eyo yaamuncererya waamini wanyu. Atthu othene annoona vano, Owo ori vaava, Eroho emosaru yeeyo paahi. Nto muupuwele, Yesu aahihimya yeela, ohinatthi okathi wa woomaleloni. Eyo enikhhalaka ekhanyeryo yookiserya okathi wothene.

¹⁸⁵ Nihiku nlo, Leo ni miyo naakilanthi mphironi, nto akina wa hiyo evanelaka. Nto miyo kinnitthikela koonaka wira wookhala murukunxo onoorwa, murukunxo onoorwa. Okathi olavunly'ahu yeeyo, khunrowa okhala orukunuwa wa muteko aka, 'okhala wira khivanweryaneya wiireya—tho, masi onrowa okhala murukunxo mwa miyo. Miyo okathi wothene kinikhala ootteettheya ni waahiya atthu paahi okihoolela ni okeettiherya, n'ukiroiha epantte *ela* ni epantte *ele*. Vaakhanle wira kaahiira etthu Apwiya yaakirummy'aya wira okathi ovinre khalayi, nkaarowa okhala mmulattuni mury'aka—mo olelo. Miyo kinookhuma esuman'ela enoorwa kakhale ni Muluku paahi. Ayo, mulopwana. Miyo—miyo kihaana wiiwa enikhuma Wirimu. Nkintthuna okhala ootteettheya, kintthuna kikhale oolipa mwa ikupalelo saka.

¹⁸⁶ Mulopwan'owo, Eyo vekeekhai entthikela erwaaka wa yoowo, owo okilanthi ottuli sana, 'okhala wira mulopwan'ole onimwaamini, owo khweeli onimwaamini. Miyo kinniweha muthukumano mapuro othene, vano Eyo entthikela emmorelaka mulopwan'ole. Yookhala entthun'awe, owo onoohaaxeya, masi owo onihaxeya mwaha wa mutthu mukina. Eyo ekeekhaii. Nyuwo muninkelela mutthu mukina. Nyuwo murina mutthu mukina vamurimani wanyu. Eyo ekeekhaii,

kehiyo? Ti mpatthan'inyu. Kooleelani ele ori mukattyamiho wa mpatthan'inyu uwo, munimwaamini wira ka murumeyi a Muluku? Onamuhapaliwa. Eyo ekeekhaii. Yaari ekeekhai, muvenxe ntata nanyu.

¹⁸⁷ Nyuwo munnaamini? Ookhala mutthu nno ovenxale ntata nawe, muthiyana mmosa ottuli nno, ookhala mutthu. Ayo. Ayo. Nyuwo khamunkisuwela? Miyo ka mmalapo wa nyuwo othene? Miyo nkinoosuwelani, masi Muluku onnoosuwelani. Nyuwo munnaamini yeeyo? Vakhala wira Muluku onookuupululela eri vamurimani vanyu, munimwaamini wira ka murumeyi Awe? Mwaamuthiyana, etthu mukhalely'anyu oohaaxeya mwaan'owo vo. Eyo ekeekhaii. Vano mwaan'owo orina ovele wiitho wawe. Tothoro khanwerya wira hat'etthu mwaha wa yeeyo. Nyuwo mwa muletto nno, nyuwo ni oophentiwa anyu okilanthi vale. Nyuwo munnaamini wira Muluku onniwerya okileela wira nyuwo mw'ani ni otthu onkhum'anyu? Munnaamini? Mwaamwaakhela openuwa wa mwaan'owo vakhala wira Owo onohimya? [Muhano onira, "Ayo."—Mol.] Vaareera, mutthikeleke oSomerset, Kentucky, weiwo onikhum'anyu. Ni mwaamini wira owo onookhala sana, ovele anyu onoomuhiya mwaana mwawerya vale waamini.

¹⁸⁸ Okathi ohimmy'aka nuulumo nlo, mutthu mmosa eemenle ottuli iwe munvireloni w'ovolowa, onikhuma oSomerset, Kentucky, alompaka, ni mukattyamiho wa murima. Nyuwo munaamini wira Muluku aamwaakhaliha akumi? Mwaaminikiru ni murima anyu wothene, ni waamini wira Muluku aamwaavoniha ni waakhaliha akumi.

¹⁸⁹ Va, ela eri va, miyo kookupali wira ookhala mutthu ovenxale ntata wenna nno, weiwo iwo, muhano mmosa. Ayo, kihoona ntata nanyu. Miyo ka mmalapo wa nyuwo, muhano? Miyo nkinoosuwelani. Hiyo khinnatoko okumana. Nyuwo munnaamini wira miyo ka murumeyi Awe? [Muhan'owo onira, "Ayo."—Mol.] Munnaamini? Nyuwo mookhalana muritti vamurimani vanyu, wala etthu. Nyuwo munnaamini wira Muluku awerya vale okuupululela, munnaamini wira Eyo Eroho yeeyo yaari mwa Kristu? Aiy'anyu akilanthi vale, awo annaamini etthu emosaru, nave? Nyuwo mwaamwaamini etthu emosaru? Eyo mwaha wa mwanamwane anyu mwaamuthiyana okilanthi vakhiviru ni nyuwo vo. Eyo ekeekhaii, owo orina kankuru. Masi nyuwo munnaamini wira Muluku onoomuvoniha? Mwaaminiki vale, muvenxe ntata nanyu. Vaareera, mwiixathere matata anyu vasulu va mwaan'owo.

¹⁹⁰ Pwiya Yesu, Ohoolo w'Eroho Anyu, miyo kinnimuulumela xetwani onimwiiva mwaan'owo. Miyo kinnihela, ni waamini, Ephome ya Yesu Kristu eriyari ya namwii'ole ni mwaana. Mmuhiye akhale mukumi. Amen.

191 Mmwaamini Muluku. Muhihoverye. “Mwaaweryaka waamini, sothene sinniweryaneya.” Mwaaweryaka waamini, sothene sinniweryaneya. Vooloka-vo.

192 Mutthu mukina ottuli iwe oovenxa ntata nawe, nipuro nlo, nyuwo, muhano mmosa wookiseryani iwe. Munnaamini wira ka murumeyi a Muluku? Miyo nkinoosuwelani, nyuwo khamunkisuwela. Munnaamini wira Muluku onniwerya okuupululela ele eri mukattiyamiho anyu? Mwaamukupali Yesu okhala Mpenuxa anyu ni Mulipa-onvaha, etthu p’itthu—enakhaleru etthu p’itthu...? Munnaamini nto? Vaareera, vano ovelola iwo mwaarin’anyu, ti yeeyo mwaarin’anyu. Yaari ekeekhai, nvenye mweemele, yaari ekeekhai, wira atthu yoone paahi wira ekeekhaii. Vaareera, eyo enimoohiyani naanaano. Rowakani owaani mukhale mukumi. Muluku ooreeriheni.

Nyuwo munikhuma oKentucky, nave. Uh-huh, eyo ekeekhaii.

193 Muhano okilanthi vakhiviru ni nyuwo t’oKentucky, nave. Owo ta weiwo, nave. Miyo nkinoosuwelani, kinnoosuwelani? Masi kinoowerya wooleelani wira yookhala etthu evonyeiye ni nyuwo. Kawerya vale wooleelani etthu evonyeiye ni nyuwo, munnimukupali Kristu ntoko Mpenuxa Anyu? Eri muyuununi mwanyu. Yaari ekeekhai, muvenxe ntata nanyu, osulu sana wira atthu ewerye wona. Vaareera, rowani owaani vano, enimoohiyani. Waamini wanyu onnoovonihani.

Miyo kinnootharimulani wira mwaamini. Miyo kinnitharimula waamini wanyu wira mwaamini.

194 Va okilanthi muhano va, avekelaka, orina nleso nawe vasulu wo wiitho wawe. Miyo nkinoosuwelani. Muluku onnoosuwelani. Nyuwo mwa ooJoliet, Illinois, ni nyuwo murina nipotthe. Eyo vekeekhai ekhweeli. Khino nyuwo munimwiikoha... (Ayo, owo ti mu—owo ti muthiyana Rosella omurunh’awe. Eyo ekeekhaii. Mulipelele, owo aahikileela yeeyo, masi owo khanasuweleke wira miyo nkinamusuweleke muthiyan’owo. Eyo ekeekhaii. Eniiraneya paahi waamini wa muthiyan’owo waari wuulupale.) Miyo kinimooleelani etthu emosa nyuwo—nyuwo moosuwela wira nkinoosuwelani. Nyuwo muninvekelela mwaan’ola okilanthi va wookiseryani w’ekhukulu, onwereiwa. Owo mwan’inyuu. Eyo ekeekhaii. Amen. Nyuwo moosuwela wira nkaasuwenle eyo.

195 Ele eri vale, Eyo Eroho Yowarya! Nyuwo munaamini Yeeyo? Nyuwo munnikupali Yeeyo? Vano yaari ekeekhai, yeeyo ehimmy’aka “mukhora ti woophunyeya, ni ephiro ti yoorika” ekeekhaii. Yesu Kristu, Mwana a Muluku, ori vaava vano. Eroho ya Muluku mukumi eri vaava va. Nyuwo munnaamini Yeeyo? Vano, wira koosuweliheni wira miyo nkihiyo hata mutthu wira kivonihe, nkihiyo mpenuxa, masi Eroho ya Muluku erookithanla paahi wira yiisooniherye Mmansaya. Miyo hata nkisomme.

Nkirina hata osuwela wa hat'etthu. Masi eyo Eroho Awe eniira, moone, ni Owo ontthuna wira musuwele wira kooleleni Ekeekhaii.

¹⁹⁶ Ela ti Ekeekhai, wira Yesu Kristu onnimukhaliha mukumi khula mmosa a nyuwo naanaano va nyuwo mwaaminiru yeeyo. Vano ntoko paahi... Vakhala wira Eyo yaahivara muteko oKingston, weiwo arummwa, wala mutthu ti mutthu ottuli iwe, oonne Eyo ovara muteko oKingston, atthu ikonto sene evonihwaka, exeni Eyo ehinrow'aya ovara muteko nno mwa Amerika mu weno hiyo orin'ahu enamuna siry'aya vano? Nihinweryelani hiyo waamini? Okhala wira hiyo khaninwerya olapuwa ekhwarara ele yaamukhaani nirowaka iwe. Nyuwo munaamini iyo? Muvenxe matata anyu.

¹⁹⁷ Vano, matata ene yaawo, mmwiixatherye mutthu ori vakhiviru ni nyuwo, mukihiye miyo kinvekelele okhuma weno, ni nyuwo muhikhale oohoverya tho hata vakhani mmurimani mwanyu, ela enoomaliha eyo.

¹⁹⁸ Oh, wulu, Munna Neville! Moota miyo ontthunak'aka, moota miyo onvekelak'aka, moota miyo... Khino nyuwo munuupuwela wira kookhuma mw'ankhili aka; nkikhumme. Miyo kinnisuwela sana vatthu vary'aka. Vaakhanle wira kaaniwerya paahi wooruuhelani etthu ila yaamukhaani nyuwo! Nyuwo munnisuwela wira Yesu Kristu, Mwana a Muluku, ori wa eriyari y'athu voosiis'ula, naanaano va, ori vaava naanaano va, iisoonihaka Mmansawe?

Ahe, nyuwo muniira, "Munna Branham, *nyuwo* muhimmye eyo."

¹⁹⁹ Kihimmye sai iyo? Miyo nkinoosuwelani. Ookhala muthiyana mukina orina elapaha. Nyuwo moovonihiwa, murokor'aka. Muluku ooreeriheni. Mukilevelele, nyuwo mwaamuvekelele muthiyana orina elapaha, 'okhala wira owo muthiyana a maihi oottwelele. Ayo. Vaareera, mwaamini. Vaareera. Owo ori vaava. Ola ti Mukhalelo Awe.

²⁰⁰ Vano, va eri ile Owo ohimmy'awe, "Miiriirya iya sinimwaatthara ale anrowa waamini. Awo yawiixaathera matata aya aretta, awo anoovona." Vanweryaneya sai Owo wootha? Moone, eyo kahi Yawawe, eyo kahi yawaka, vano ti yawinyu. Vano nyuwo mwaamini.

²⁰¹ Miyo kinimuweha mwaamuthiyana mmosa okilanthi ottuli iwo naanaano va, owo khonreere waamini. Owo n'aiy'awe naanaano yaahirwa w'Apwiya. Owo aakilanthi vaava vamuthukumanoni, aaroothikileya mutika mpakha tothoro aarowa omooperari okathi vakhani ohinatthi, nto mwan'awe aahalela oyariwa. Vano tothoro aarowa omooperari numala, masi mwaana ooyariwa ni awo khanwerya-tho omuphwanya hata xipaatta. Oomala othene. Munnona? Mwaha wa xeni? Owo okilanthi paahi ntoko... Owo khonakhaleke osulu

nno vaplataforma siiso. Owo aarookilaathi ottuli iwe paahi khwaamini iyo. Eyo ekeekhaii, Muhano Green, kookupali wira ti siiso, ottuli iwo? Eyo ekeekhaii. Munnoona ntata nawe? Tothoro khanwerya hata ophwanya othikileya, wothene woomala. Mwaha wa xeni? Owo aarimwaamini iyo, khikhuma paahi khwira, “Eyo ekeekhaii!”

²⁰² Vano nyuwo mwiire yeeyo, ni khula muxankiho nyuwo orin’anyu ohaana okhuma. Muluku, Ole onwerya—Ole onwerya oveleeliha Etthu mw’erutthuni mwa mutthu, wira nakuru a elumelo ele y’enowa aari munawoni wa mulopwan’ole, amuhapalihaka, wira amwiive, ni onwerya omaaliha ni wiiva vaavale vene, vaatepa Owo owerya wiiva eretta eri mw’erutthuni mwanyu. Okhala wira, mulopwan’ole aari ooxanka ni aahaana okhalana mukhaliheryo. Nyuwo muhaana, nave. Nyuwo mwaahikhalane mukhaliheryo, munimookhwa.

²⁰³ Vano mukhale ni matata mmosa vasulu va mukhw’awe. Muhiivekelele mmansinyu, mmuvekelele mutthu ori vakhiviru ni nyuwo. Eyo t’inamuna y’eKristu.

²⁰⁴ Mwiixutte ela, mwiixutte ela, wira, siiso muniwiirel’anyu akina, munimwiirela Kristu. Nyuwo mwaakhalaka oomureerela murima mutthu mukina, munimureerela murima Kristu. Nyuwo mwaamuhaaxaka mutthu mukina, munimuhaaxa Kristu. Oh, wulu!

²⁰⁵ Oh, vaakhanle wira kaaniwerya okuxa ela wira kitholathole, vaakhanle wira kaaniwerya paahi owiiriha athu wona, ele miyo enweh’aka ni ele miyo enoon’aka esimu, ni ele miyo ensuwel’aka wira enimwiiraneya, moone. Moota Kristu onlipihery’awe Mutthak’ole voosiis’ula, wira okhuruwele olukame mmurimani mwa’tthu ni okhalihe etthu mme; kahi okwanyuwa, kahi wuukhuwa (eyo enrwa ni yeeyo), masi okhaliha waamini ohinkhwa mme ohinrowa wira, onvaha epelekaata emosa nwanani.

²⁰⁶ Vano, Owo onimwiwa nivekelo naka, Owo onimwiwa nawinyu. Nvekelelane mmosa ni mukhw’awe vano, okathi miyo onoovekelel’akani othene anyu.

²⁰⁷ O Pwiya, okathi ula muulupale wootthuneyexa, hiyo ninnisuwela wira ela enoorowa ohimya evirikanelo y’okhwa ni ekumi, wa anci-ene. Nto miyo kinnithukumela Ohoolo Wanyu, maana kinnisuwela, Pwiya Muluku, wira kihaana ovekela ni murim’aka wothene. Miyo kinnisuwela wira hata ekhalaka wira onoohikhala hata mutthu onwereiwa eriyari ahu mwa minutu mithanu sinttharelana, wira khula mutthu va onoosuwela wira Nyuwo muri vaava. Awo aniphwanyaneya va voosiis’ula, Pwiya. Muhaahiya athu awo ovenxa matata aya yaawo yaasuwela wira miyo nkinaasuwela, ni hat’etthu ya yaawo. Masi Eroho Anyu ennaasuwela awo. Nyuwo munnisuwela isiiri sa mmurimani mwaya, vaatepaxa Nyuwo osuwela mixankiho saya ni ihaawelo

saya! Vano, Pwiya, okhale olelo, okhale naanaano va Eroho Anyu enrow'aya okwannya irutthu saya sinwereiwa. Munivahe, Pwiya. Awo anoovekelelana mmosa ni mukhw'awe.

²⁰⁸ Nto miyo kinnivekela, Muluku Ootthuneya, wira Eroho Yowarya ekhalihe y'ekeekhaixa wa awo, wira awo ehikkhalakhale ehoveyaka tho. Ni yookhala eretta ekina, Pwiya, eri yuulupalexa ovikana erett'ela y'erutthu, eyo eretta ya erooho. Khula murima okhale wootthukuwa.

²⁰⁹ Pwiya, enikhala sai wira Nyuwo mweemenle vale vakhiviru n'Abrahamu, khupaka etthu emosaru yeela, khimuhimeerya Sara yoowo aari "ottuli" Wanyu, Yoolempwa enihimya wira, "owo aahithey muheemani," nto Nyuwo khimuleela. Nto Abrahamu khisuwela wira ole aari Elohim, Muluku muulupale. Minutu vakhani Nyuwo mwaahilakaseya owiitho wawe.

²¹⁰ Nto, Pwiya, okathi Yesu eemenly'awe khwira etthu emosaru, ni khwira, "Nyuwo moowmiihana Abrahamu okhala 'tith'inyu,' ni nlelo wira munnisuwela Soolempwa." Khwira, "Nyuwo munoovonya, ohisuwelaka Soolempwa hata Owerya wa Muluku." Nto awo khumwiihana Owo "Pelizepuli."

²¹¹ Masi Nyuwo mwaahihimya wira mahiku ookiserya wira Nyuwo mwaamurowa omwarexa-tho Eroho Anyu. Profeta ohimye wira, "Okathi wa makaaripi onookhala Warya." Nto hiyo nri va.

²¹² Okathi olumwenku ula woohitthara ikano onimorel'aya vathi v'etampi, ntoko mutthu oohapaliwa onveveley'awe arowaka owaani ohiyu, naanaanoru onoorowa ophuliwa eriyari, khaninrowa hata okhala ntthupi na mwaako wooruma, khino, noohala wa yoola. Ni hiyo ninnoona okathi orowaka voohihyererya.

²¹³ O Muluku, mukumihe khula ohoverya ori mwa hiyo. Muneettiherye mpakha mmutthekoni memmo nanaano va. Murwe, Eroho Yowarya. Mookole mapupha Anyu maalupale, muvave vasulu va muthukuman'ola mwaamukhaani w'atthu naanaano va, ni muhiye Mmansinyu muponowele mirima saya, ni mwaahiye esuwele wira Nyuwo muri mwa Mukhalelo w'oMuluku, wira ti Nyuwo, "Miyo k'Apwiya anvoniha iretta sanyu sothene." Ni wira Mukhalelo Anyu wiire etthu mmurimani mwaya enrowa owiiriha awo okhuma va, voosiis'ula, yaaminiki ni sothene siri mwa yaawo. Ni wira khula mutthu muretta ni ooriipiwa murima avonihawe.

²¹⁴ Maana, ntoko murumeyi Anyu, miyo kinoovenya ni omuulumela khula xetwani, kinnuulumela eretta, kinnimuulumela Satana.

²¹⁵ Nyuwo mooxinttiwa, ni nyuwo khamuhiyo hat'etthu woohikhala mwiikuxererya paahi. Ni hiyo ninniwoonelani voosiis'ula, mwa Nsina na Yesu Kristu. Ni ntoko murumeyi Awe, kilaleyaka Masu Awe ni kaaleelaka atthu Ekeekhai,

wira yiilakiherye ni yiilikanyihe ni Masu a Muluku, miyo kinniwuulumelani nyuwo, Satana, mwa Nsina na Yesu Kristu. Mmukhume khula mmosa a atthu ala aruule ekhumaka ottaiwene ni vakhiviru, wira evonihiwe. Mukhume vamuthukumanoni va ni mwa atthu ala. Miyo kinoovirikanyani mwa Muluku mukumi. Ni Bibilia ohimnye wira, “Malompelo n’uvara metto, wa mutthu ooreera murima onniwerya vaalupale.” Nto atthu anci-ene ooreera murima aawiixaatthera matata aya aretta, voosiis’ula va. Oh, Satana, nyuwo mwaatthuna owuupuwelaha wira kaari miyo, vano nyuwo mwaamukhalana ovuwa mwa yaawo. Masi omwaamini waya Muluku, nave, awo annimwaamini Muluku! Nto nyuwo muhaana orowa, mwaha wo waamini waya. Tivo muroweke mukwaha anyu murowaka ottaiwene ni va, ni murowe ota mweepiphini okhanl’anyu a weiwo. Miyo kinniwuulumelani, mwa Nsina na Yesu Kristu, n’uwerya wa Bibilia a Muluku, orummwa waka ni Nlaikha. Vano murowe, mwa Nsina na Yesu Kristu, ni mwaahiye etaphuwe. Amen.

²¹⁶ Nyuwo munnaamini, ni murima anyu wothene, wira moovonihiwa? Muvenxe ntata nanyu, mwiire, “Miyo vano kinnimukupali Yesu Kristu ntoko Mpunexa aka. Miyuuttutthi sothene sookimwareya. Miyo vano kinnimukupali Uwo mwa omalela w’owerya Wawe, mwa oreeriwa wa Mukhalelo Awe. Miyo kinnimukupali.”

Waamini waka onweha wa Nyuwo,
 Nyuwo Mwaapwittipwitthi a oKalvario,
 Moopoli muluku;
 Vano mukiwe okathi onlomp’aka,
 Mukumihe itampi saka sothene,
 Muhikihye nnakhala kikhumelaka
 Ottaiwene wa Nyuwo.

Vano nivenxe matata ahu voomaaleleya sana wa Yoowo vano.

Okathi oneett’aka mmukattiyamihoni
 mooriipela a makhalelo,
 Ni oxanka otepaka waatta
 vamphwanyaney’aka,
 Nyuwo mukhale Muhooleli aka (O Muluku);
 Murukunxe ephi okhale othana,
 Mukumihe oxanka, ni woova,
 Muhikihye nnakhala kikhumelaka
 Ottaiwene wa Nyuwo.

[Munna Branham onipacerya wiipa muhina muhina
 Waamini Waka Onweha Wa Nyuwo.—Mol.]...mahala
 oowaatta!



MUKHORA TI WOOPHUNYEYA EMK59-0301M
(Strait Is The Gate)

ETTHARANELO YA IKEREJA

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yettata 1 mweri wa Março, 1959, oBranham Tabernacle oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org